
**SANT POUR
ZEOVA
AVEK LAZWA**

SAN NOT

SANT POUR ZEOVA AVEK LAZWA

—1 KRONIK 15:16

SAN NOT

Non

Kongregasyon

**Nou pa vann sa liv. I ganny servi dan sa travay mondyal pour ansenny
dimoun lo Labib e i ganny soutenir par kontribisyon volonter.**

Si ou ti a kontan fer en donasyon, al lo donate.jw.org.

*Sant pour Zeova avek lazwa—San not
“Sing Out Joyfully” to Jehovah—Lyrics Only
Enprimen Mars 2020*

Seychelles Creole (*sjjyls-SC*)

© 2016

Watch Tower Bible and Tract Society of Pennsylvania

Editer

Publishers Information EPS Box 04

(Printing Branch to Insert)

REP.FRO\PUB_04.EPS

(w:105.00 mm x h:50.00 mm)



sjjyls-SC
200406

Bann diferan size

| | |
|---|---------|
| <i>Zeova</i> | 1-12 |
| <i>Zezi/Ranson</i> | 13-20 |
| <i>Rwayonm</i> | 21-24 |
| <i>Bann Kreyen swazir ek lezot mouton</i> | 25-27 |
| <i>Nou relasyon avek Zeova</i> | 28-40 |
| <i>Lapriyer</i> | 41-47 |
| <i>Dedikasyon</i> | 48-52 |
| <i>Nou minister</i> | 53-84 |
| <i>Zwenn ansanm</i> | 85-93 |
| <i>Lekritir</i> | 94-98 |
| <i>Nou lasosyasyon frer ek ser</i> | 99-103 |
| <i>Bann bon kalite Kreyen</i> | 104-130 |
| <i>Fanmir/Zanmi</i> | 131-138 |
| <i>Nou lespwar</i> | 139-147 |
| <i>Delivrans/Rezireksyon</i> | 148-151 |

1

Bann kalite Zeova

(Revelasyon 4:11)

1. Bondye Zeova, ou ki tou pwisan
Ou sel Sours lavi ensi ki lalimyer.
Kreasyon i devwal ou gran pwisans
Lesyel ek later, ou gran lanmour.
2. Ou tronn in batir lo ou lazistis.
Ou ansenny nou tou, ou lalwa bon, perfe.
Atraver ou Parol nou dekouver
Ou gran lasazes ki pe briye.
3. Nou loue ou pour ou lanmour perfe.
I merveye pour imit ou labonte!
Ou non glorye ek ou bann kalite,
Nou pou proklanm lo later antye.

1. Nou vre Bondye vivan
Ou Bondye tou kreasyon
Depi tou zenerasyon,
Zeova i ou non.
Nou fyer e onore
Pour form ou kongregasyon.
Ou laglwar, nou anonse,
Dan tou tribi, nasyon.

(REFREN)

*Zeova, Zeova,
Napa ki parey ou.
Napa ni enn ki dan lesyel
Ni anba lo later.
Ou tousel Bondye Tou Pwisan,
Zonm i bezwen konn sa.
Zeova, Zeova,
Nou napa lot Bondye ki ou.*

2. Ou kapab fer nou vin
Nenport kwa ki ou anvi,
Pour ou plan ganny akonplir,
Zeova i ou non.
Nou Temwen pour sa non
Ou'n donn nou akoz ou bon.
Ou'n fer nou vreman spesyal
Ler ou'n donn nou ou non.

(Refren)

3 Nou lafors, nou lespwar, nou konfyans (Proverb 14:26)

1. O Zeova, ou'n donn nou lespwar,
en lespwar merveye.
Sa lespwar nou vreman kontan,
nou le lemonn tande.
Me parfwa bann problem dan lavi
i fer annan lafreyer
E sa lespwar ki nou annan,
en sel kou i vin sonm.

(REFREN)

*Nou lafors, nou lespwar,
konfyans i dan ou.
Sa ki nou napa ou donner.
Ler nou prese, ansennyen,
nou konfidan
akoz se lo ou, nou depan.*

2. Silvouple Zeova donn nou en
leker rekonesan,
Akoz ou touzour konsol nou
ler nou dan en problem.
E sa bann panse ki soulaz nou
i kapab donn nou lafors,
Akoz i fer nou ganny kouraz
pour koz lo ou gran non.

(Refren)

4

“Zeova i mon berze”

(Psonm 23)

1. Zeova i mon bon berze.

Mon pou al kot i gid mwan.

I pran byen swen avek son mouton.

I konn sa ki mon bezwen.

I kondir mwan kot sours delo,

Mon pe ganny ankouraze.

Avek son lanmour fidel, i gid mwan,

Mon ganny repo ek lape.

Avek lanmour fidel, i gid mwan.

Mon ganny repo ek lape.

2. Menm dan en vale ki fernwanr,

Mon pa per lo sa semen.

Mon bon berze i pros avek mwan,

Son baton i gid mwan byen.

I ed mwan pour toultan reste

Lo sa semen ladrwatir.

Mon pa pou per persekisyon, danze.

Ou mon zanmi ek Bondye.

Mon pa per persekisyon, danze.

Ou mon zanmi ek Bondye.

3. Zeova, ou mon bon berze.
Mon pou al kot ou gid mwan.
Ou fortifye e ankouraz mwan.
Ou donn sa ki mon bezwen.
Mon pou annan konfyans dan ou
E mars drwat lo ou santye.
Mon pou reste fidel tou mon lavi,
Kontinyen pran swen ek mwan.
Mon reste fidel tou mon lavi,
Kontinyen pran swen ek mwan.

5

Travay merveye Bondye

(Psonm 139)

1. Ou konn tou mon mouvman O Bondye,
Ler mon dormi e ler mon pe leve.
Ou egzamin mon panse ek mon leker,
Parol ki mon dir, sa ki mon fer,
ou konn byen.

Ou ti vwar ler mon ti pe formen,
Ou menm konn tre byen tou mon bann lezo.
Ou'n vwar mon form e tou sa ti an ekri.
Mon kontan ou travay
ek lafors merveye.

Ou konnesans i vremen gran Zeova.
Mon konn tousala dan en fason kler.
Menm si mon per ki fernwanr pou anvlop mwan,
Ou pou la e trouv mwan menm dan fernwanr.

Kote mon pou kasyet, Zeova
Oubyen reste kot ou pa pou vwar mwan?
Pa dan lesyel, ni lwen dan latonm anba,
Pa dan montanny ek lanmer,
ni okenn landrwa.

6 *Lesyel i deklar laglwar Bondye* (Psonm 19)

1. Lesyel deklar laglwar Bondye Zeova.
Zis get anler e vwar travay
son prop lanmen.
Sak nouvo zour i anmenn li louanz.
Son lanmour, pwisans dan aswar,
Zetwal i proklanmen.
2. Lalwa perfe Zeova i donn lavi
E tou son bann rapel
i gid zenn ek aze.
Tou son bann lord i bon, zis, drwat e vre.
Son lalwa pir, Son Parol sir
I tre bon pour goute.
3. Respe pour li i pir e i pour touzour.
Valer son komannman
i pli presye ki lor.
Son bon lalwa i gid e protez nou.
Son loner, bon repitasyon,
Non sen, nou donn sipor.

Zeova, nou lafors

(Izai 12:2)

1. Zeova, nou lafors ek nou viger.

Nou ganny vre lazwa dan ou nou Sover.
 Nou, ou Temwen ki proklanm ou mesaz,
 Avek tou dimoun, nou rann temwannayaz.

(REFREN)

*Zeova nou Ros, lafors ek viger,
 Nou proklanm ou non, nenport ki ler.
 Bondye Zeova, ou ki Tou Pwisan,
 Ou nou landrwa kasyet dan movetan.*

2. Atraver Kris nou rod lazwa, lape.

Laverite in ouver nou lizye.
 Ou Parol i ansenny nou ou lalwa.
 Nou pou reste lo kote Zeova.

(Refren)

3. Avek lazwa nou fer sa ki ou le.

Latak Satan pa pou fer nou tonbe.
 Menm devan lanmor, O Bondye ed nou
 Pour gard nou fidelite anver ou.

(Refren)

8

Zeova i nou refiz

(Psonm 91)

1. Zeova i nou refiz,
Nou met konfyans dan li.
Son lonbraz i nou labri,
Ladan nou pou reste.
I pou defann nou tou letan,
Zeova i en latour for
Ki pou toultan protez nou,
I touzour fidel, drwat e zis.
2. Menm bokou pou pe tonbe
Lanmenm dan ou kote.
Bann ki dous e bann ki zis
Pa pou ganny rezete.
Pa bezwen per oubyen tranble,
Maler pa pou fer ou tonbe.
I protez ou kont danze,
Anba son lezel nou reste.
3. Zeova pou protez nou
Kont pyez dan nou santye.
Ou pa pou zanmen tranble
Avek gran lafreyer.
I pou protez ou ek latak.
Kot ou ale I pou ek ou.
Zeova i nou refiz.
Li ki pou touzour protez nou.

9

Zeova i nou Lerwa

(Psonm 97:1)

1. Rezwir, laglwar i pour Zeova,
Akoz lesyel in proklanm son ladrwatir.
Annou sant bann sanson zwaye pour loue li.
Annou koz lo tou son bann travay.

(REFREN)

*Lesyel i rezoui, later i dan lazwa,
Zeova in vin nou gran Lerwa!
Lesyel i rezoui, later i dan lazwa,
Zeova in vin nou gran Lerwa!*

2. Annou koz ek bann nasyon lo Ya.
Tou le zour tou son bann travay merveye.
Zeova i Lerwa, i merit ganny loue.
Annou ador li devan son tronn.

(Refren)

3. Rwayonm nou Bondye in etabli.
Lo son tronn i'n donn pouvwar son sel Garson.
Me laont, dezoner pour
bann bondye lemonn,
Akoz louanz i zis pour Bondye.

(Refren)

10

Loue Zeova nou Bondye!

(Psonm 145:12)

1. Loue Ya! Bondye, Zeova!

Proklanm avek tou, son gran non!
Averti ki son zour i pros,
Pour sa bann ki tande, ekoute.
Bondye in deside ki i letan
Pour son Garson konmans rennyen.
Ansenny dimoun, tou bann benediksyon,
Ki son Rwayonm pou anmennen!

(REFREN)

*Loue Ya, Bondye Zeova e
Proklanm son grander lo later!*

2. Loue Ya! Sant laglwar Bondye!

Sant avek lazwa, sant byen for!
Dir mersi ek tou ou leker,
Sant son laglwar ankor e ankor.
Menm i Kreater sa gran liniver,
I demontre limilite.
Ek lanmour fidel i pran swen ek nou,
Kan nou priye, i ekoute.

(Refren)

1. Kreasyon i loue laglwar Bondye,
Lesyel i rezonnen avek louanz.
Kreasyon i koze san fer en son.
Nou tann son mesaz dan tou kwen lemonn.
Kreasyon i koze san fer en son.
Nou tann son mesaz dan tou kwen lemonn.
2. Respe pour ou, sa i vre lasazes.
I protez nou aksyon ek nou parol.
Ou annan bon konsey pour zenn ek vye,
En vre trezor ki pli presye ki lor.
Ou annan bon konsey pour zenn ek vye,
En vre trezor ki pli presye ki lor.
3. Ler nou konn ou, nou lavi pa anven.
Ou parol i touzour gard nou vivan.
Tou dimoun pou ganny sa pli gran loner,
Si zot sanktifye ou gran non sakre.
Tou dimoun pou ganny sa pli gran loner,
Si zot sanktifye ou gran non sakre.

1. Zeova, Tre O, ou ki merite,
 Louanz, laglwar eternal.
 Tou ou aksyon i perfe.
 Tou sa ki ou fer i zis, bon e vre.
 Bondye pour leternite!
2. Ou pardonn pese, bann lofans ek fot.
 Ou demontre konpasyon,
 Pour sa ki pardonn lezot.
 Ou rekonfort nou, ou toultan ed nou
 Ou bon e ou ekout nou.
3. Ki dimoun ek lanz i zwenn pour loue
 E glorifye ou gran non
 Ek lazwa san arete.
 Zeova Tre O ou ki merite.
 Ki nou loue ou touzour.

1. Ki lanmour, labonte,
Par donn son sel Garson.
Bondye in montre tou dimoun lo later.
Kris ti vin en imen,
Sa Garson zonm ti ne.
Son legzanp i loue non Zeova.
2. I ti ganny konnesans
Dan Parol Zeova.
Sa ti donn li lasazes ek bon zizman.
I ti kit en model,
Fidel ek son Papa.
Fer son lavalonte ti son plezir.
3. Zezi i nou model,
Annou loue Bondye
E swiv lepa Kris fidelman pour touzour.
Parey Zezi annou
Toultan fer Li plezir.
I pou kontan nou pour leternite.

1. En gran lafoul sorti partou
lo later pe rasanble.
Par Kris ek tou bann Kretyen swazir
zot pe ganny rasanble.
Rwayonm Bondye in etabli,
Later pou soumet avek li.
Sa lespwar i enn vreman presye,
Ki rekonfort e rann ere.

(REFREN)

*Tou louanz pour Zeova, Osi pour Zezi
Kri ki'n sov nou gras a son ranson.
Nou tou nou aksepte son renny mil an
E loue li pour touzour.*

2. Salye Kris, nou Lerwa
avek en lavwa for e zwaye.
Prens Lape in vin nou lerwa,
i pou ziz limanite.
Lavenir ranpli ek lazwa,
Pou napa laper ni traka.
Kan tou bann mor pou resisite,
En gran moman pour selebre.

(Refren)

1. Loue Garson Bondye,
 Bondye in fer li lerwa.
 I en lerwa zis e vre,
 Pour anmenn boner, lazwa.
 Avek dinyite, splander,
 Lanmour pour non Bondye,
 Zistifye drwa Zeova,
 Proklanm son souvrennte.

(REFREN)

*Loue Garson Bondye!
 Loue byenneme Bondye.
 Asiz lo Montanny Siyon,
 Renny in deza konmanse!*

2. Loue Garson Bondye,
 I'n mor pour li sov nou tou.
 Pey ranson ek son disan,
 Pour fer Bondye pardonn nou.
 Nouvel marye in pare,
 Tou an blan, abiye.
 Maryaz ki pou fer osyel
 Pour konfirm renny Bondye.

(Refren)

16

Loue Ya pour son Garson

(Revelasyon 21:2)

1. Bondye in swazir son Garson
Pour renny lo later antye.
Son tronn i fonde lo lazistis,
Later pou soumet ek Bondye.

(REFREN)

*Loue Ya pour son Lerwa swazir.
Loue Garson Bondye, Zezi,
Ou ki gard fidelman zour apre zour
tou son bann regilasyon.
Rann glwar Ya pour son Lerwa swazir,
wi, Lerwa son Rwayonm glorye
Abiye avek splander ek pwisans,
onor Bondye ek son non.*

2. Frer Kris, swazir e apele.
Nouvo nesans par Bondye.
Zot pou pran par dan travay Rwayonm,
Anmenn Paradi ek lape.

(Refren)

1. Ki lanmour Kris in demontre
 Kan i ti sorti dan lesyel.
 I'n pran swen avek nou
 An parol, aksyon.
 I ti donn lanmour ek letan.
 I'n konsol bann ki rezete
 Geri malad ek envalid.
 I'n prouv li fidel e obeisan.
 I'n dir ek lanmour: “Mon oule.”
2. Nou osi nou swiv son legzanp
 Dan tou sa ki nou fer sak zour.
 Nou bon, dous e zantiy
 Ek bann ki nou zwenn.
 Ed zot aprann e obei.
 Nou toultan ed nou bann zanmi.
 Nou montre lanmour an aksyon.
 Tou sa bann ki demann ou lasistans
 Pare pour reponn: “Mon oule.”

18 *Nou dir ou mersi pour sa ranson* (Lik 22:20)

1. Ozordi, Zeova,
nou debout devan ou,
Akoz sa lanmour ki ou'n
demonstre anver nou.
Ou sel Garson ou'n ofer nou
pour ki nou viv.
Napa en pli gran sakrifis
ou'n kapab donner.

(REFREN)

*I'n donn son lavi pour sov nou.
Son disan presye i'n ofer.
Nou pou touzour dir ou mersi
avek tou nou leker.*

2. Pour sakrifye son prop lavi,
i ti pare.
Son lavi parfe,
Zezi ti peye ek lanmour.
Nou ti san lespwar
ziska ki i'n vin sov nou.
Prezan lavi i devan nou,
lanmor deryer nou.

(Refren)

Repa Senyer
(Matye 26:26-30)

1. Zeova, nou Papa dan lesyel,
Tanto i sa swar pli sakre!
Byen lontan, ou'n oule demontre ou lanmour,
Lazistis, lasazes, pwisans.
Lanyo Lapak ti sov Izrael
E ou pep ti ganny libere.
Plizyer syek apre Zezi ti vers son disan
E prouv ou Parol fidel e vre.
2. Dipen ek diven i rapel nou,
Grander sa pri ki ou'n peye.
La nou mazin kado ki
ou Garson in fer,
Ziska lanmor i'n obei.
Nou kontan gard sa dan nou memwar,
Ozordi nou oule rapel
Ki lanmor ou sel Garson
in pey sa ranson
E delivre nou tou dan lanmor.

3. Nou tou nou rasanble devan ou.
Ou'n envit nou e nou'n vini
Pour remersye ou ek ou
Garson byenneme,
Lanmour ki ti fer Kris desann.
Sa Repa Senyer i rann ou glwar
E i fortifye nou bokou.
Nou pou touzour swiv legzanp ki Kris in donn nou,
Avek lespwar pour viv pour touzour.

20 *Ou'n donn ou Garson presye*

(1 Zan 4:9)

1. Zeova, bon Papa,
Nou ti napa lespwar.
Sa ranson in donn en
Lespwar tou dimoun!
Nou donn ou nou lavi
E nou meyer dan tou.
I ou lavolonte,
Ki nou koz lo ranson.

(REFREN)

*Ou'n donn ou sel Garson
E la nou sant ansanm,
Nou sant sa kantik touzour,
akoz ou'n donn ou sel Garson.*

2. Ou bonte, konpasyon,
I fer nou pros ek ou.
Ou gran non, lanmitye,
Nou'n aprann kontan.
Me plis ki tou keksoz,
Ou kado pli presye.
I'n sorti dan lesyel.
I'n mor pour ki nou viv.

(Refren)

(LAFEN)

Zeova, bon Papa, nou priy pour dir mersi.
Pour donn nou ou Garson, ki sitan presye, mersi.

21 *Kontinyen rod Rwayonm premye* (Matye 6:33)

1. Sa ki presye pour Zeova,
Ki fer li vreman ere,
Se son Rwayonm par Zezi Kri,
Ki pou fer tou vin perfe.

(REFREN)

*Kontinyen rod Rwayonm premye
Osi ladrwatir Bondye.
Loue li parmi bann nasyon,
Servi li ek lwayote.*

2. Akoz ou enkyet pour demen
Ki pour bwar e pour manze?
Bondye pou donn nou nou bezwen
Si nou met Rwayonm premye.

(Refren)

3. Annou anons nouvel Rwayonm,
Ed bann dous pran pozisyon,
Zeova i zot sel lespwar
Ek son bon dominasyon.

(Refren)

1. Zeova, ou ki'n touzour la,
 Pou touzour avek nou.
 Ou'n konfye pouvwar ou Garson
 Ki fer tou dapre ou.
 La i la nou Rwayonm i la.
 I pou diriz later anba.

(REFREN)

Letan in arive

Rwayonm, pouvwar ek delivrans.

Rwayonm pe dirize.

Priye: "Vini menm, Vini menm!"

2. Satan li son letan i kourt,
 Nou konn son lavenir.
 Menm lavi vreman difisil,
 Nou fikse lefitir.
 La i la nou Rwayonm i la.
 I pou diriz later anba.

(Refren)

3. Lazwa i partou dan lesyel
Tou bann lanz pe sante.
Wi sa soulazman i reel,
Satan in ganny pouse.
La i la nou Rwayonm i la.
I pou diriz later anba.

(Refren)

1. Renny Bondye in etabli.

Renny Bondye in enstale.

I'n poz dan Siyon, ros kwen prensipal.

Alor annou tou sante

Pour nou donn laglwar Bondye.

Kris, Senyer, Sover,

in ganny met lo tronn rwayal.

(REFREN)

Ki Rwayonm Bondye pou anmennen?

Ladrwatir ek laverite.

E kwa ankor ki i pou donner?

Vre boner pour leternite.

Loue Souvren iniversel

Pour son gran lanmour fidel.

2. Kris Zezi pe dirize

E Armagedon i pre.

Vye lemonn Satan pe al ganny detrir.

La i letan pour prese

Bann ki pa ankor tande.

I ler pour bann dous

pran plas akote Zezi.

(Refren)

3. Nou kontan Lerwa Bondye,
Nou vwar ki i merveye.
Swazir par Bondye, nou soumet ek li.
Annou al kot tanp sakre
Pour enplor faver Bondye.
Zour pe vini kot
tou keksoz pou anba li.

(Refren)

1. Gete laba anler,

Sa latet montanny pli o.

La, sa montanny Zeova

Son montanny tou nouvo.

Dimoun sorti byen lwen,

Partou dan lemonn antye,

Ki pe kriy ek kanmarad,

‘Vin servi vre Bondye.’

La letan in vini

Pour bann ptipti vin en gran nasyon.

Kontinyen progresse,

Bondye i donn nou benediksyon.

Milyon pe vin ver li,

Aksepte son souvrennte.

Promet li lwayote,

Pour reste lo son kote.

2. Zezi ti donn nou lord

Pour nou pres partou kote.
Nouvel lo son bon Rwayonm
Tou dimoun pe tande.

Osyel Kris pe rennyen,
Persyad tou pran son kote.
Bann ki pe tann son lavwa
Ekout Parol Bondye.

Gran plezir pour nou vwar
Lafoul ki kontinyen ogmante!
Nou tou nou'n donn koudmen,
Ed lezot osi pour konn Bondye.

Annou tou lev lavwa
Pour fer tou dimoun tande,
'Vin kot montanny Bondye,
Kot ou pou kapab reste.'

1. En pep nouvo pour Bondye,
Bann garson ki i'n swazir.
Zot sorti parmi imen,
Zot in fer li plezir.

(REFREN)

*En pep ki pour Bondye,
Zot en pep pour ou gran non.
Zot kontan loue ou.
Partou kote zot proklanm ou non.*

2. Zot ki form en nasyon sen,
Zot anons laverite.
Zot in sorti dan fernwanr
Ver lalimyer Bondye.

(Refren)

3. Fidel anver zot misyon,
Zot ralye lezot mouton.
Zot fidel avek Lanyo.
Son Lalwa zot garde.

(Refren)

1. Lezot mouton Zezi, pe travay akote
bann frer Kris, zot lerwa ek nouvo marye.
Bann keksoz ki ganny fer
pour ed e siport zot
I bann keksoz ki i pou rekonpans zot.

(REFREN)

“Si ou ti siport zot, ou ti siport mwan.

Sa ki ou'n fer pour zot, wi ou'n fer pour mwan.

Ou travay pour zot ti ou travay pour mwan.

Ou'n fer li pour zot, Ou'n fer li pour mwan.

Sa ki ou'n fer pour zot, wi ou'n fer pour mwan.”

2. “Ou ti siport mwan ler mon ti lafen e swaf,
ler mon ti dan bezwen, pour mwan ou ti la.”
“Dir nou, kan nou ti fer sa?”
zot pou reponn li.
Aprè lerwa pou reponn e dir aköz:

(Refren)

3. “Ou'n fidel anver mwan, sa bon travay ou'n fer,
anmezir ki ou'n pres avek mon bann frer.”
Alor lerwa pou dir
bann mouton lo son drwat:
“Vin posed later e ganny lavi parfe.”

(Refren)

27 *Bondye pou revel son bann garson* (Romen 8:19)

1. Ler i pros pour Bondye revel
Son bann garson swazir.
Dan lesyel zot pou renny ek Kris
Avek pwisans ek glwar.

(REFREN)

*Bann garson pou ganny revele
Avek Kris, zot Senyer.
Zot pou ranport en laviktwar
E ganny zot rekonpans.*

2. Senyer Zezi Kri pou desann,
Sinyal pou ganny donnen.
Senyer bann senyer pou vini
I pou rasanble zot.

(Refren)

(PON)

E avek Kris, sa bann garson
Pou dan lager final.
E zot maryaz avek Lanyo
Pou dire pour touzour.

(Refren)

1. Ya, lekel ou zanmi

Ki viv dan ou latant?

Ki konn ou vreman ganny ou konfyans,

Ensi ki lanmitye?

Tou ki krwar ou Parol,

Annan lafwa dan ou,

Tou bann ki touzour fidel e zis,

Ki swiv laverite.

2. O Zeova lekel

Ki kapab apros ou?

Lekel ki fer ou leker kontan,

Ki ou konn li par non?

Bann ki loue ou non,

Obei ou Parol,

Sa ki reste fidel e senser,

Koz sa ki vre e bon.

3. Par devid nou leker

Ek ou dan lapriyer,

Nou vin pre ek ou, kontan ou plis,

Santi swen ou donn nou.

Nou le nou lanmitye

Pour ou i agrandi.

Nou pa pou zanmen ganny en zanmi,

Pli bon zanmi ki ou.

29

Port ou non avek dinyite

(Izai 43:10-12)

1. Bondye Zeova, Tou Pwisan, eternel,
Konman Souvren, ou rennyen dan lesyel.
Ou lazistis, pwisans ek lanmour parfe,
Sours vre lasazes ek laverite.
Konman ou pep nou kontan pour servi ou,
Proklanm laverite Rwayonm partou.

(REFREN)

*Konman ou Temwen, nou privez i gran.
Fer nou port ou non avek dinyite!*

2. Par travay ansanm dan ou servis sakre
Permet nou viv dan lanmour ek lape.
Ansenny laparol, reflekte ou laglwar
Leker zwaye nou anons laviktwar.
O Zeova, nou Papa, par port ou non,
Nou fer dimoun rekonnet ou gran non.

(Refren)

30 *Mon Papa, mon Bondye ek Zanmi*

(Ebre 6:10)

1. Lavi pa toultan fasil.

Lavi i anmenn larm ek soufrans.
Selman mon pou touzour dir,
“Mon lavi pa anven.”

(REFREN)

*Bondye pa sitan enzis,
Pour bliy lanmour ki mon'n demontre.
Touzour i pros avek mwan,
Ek Zeova mon pa tousel.
Bondye i protez mwan byen
e pran swen ek mwan ziska lafen.
Wi, Zeova i mon Papa,
Bondye, Zanmi.*

2. Zenn tan in fini ale,

Letan difisil in arive.
Me atraver mon lafwa,
Lespwar i sir e kler.

(Refren)

1. Mars avek Bondye dan lanmour.
Montre ou fidel e vre.
Reste pros e depan lo Zeova
Pour reste for e ere.
Toultan les ou gide par Bondye
Pour ki ou pa drive.
Bondye pou atrap ou lanmen
Ler ou port latansyon byen.
2. Mars avek Bondye, reste pir
Mazin bann keksoz ki byen.
Dan leprev oubyen ler ou ganny tante,
Ou pou kapab andire.
Kontinyen mazin bann bon keksoz,
Ki byen, fidel e vre,
Sa ki merit felisite
E Bondye pou avek ou.
3. Mars avek Bondye dan lazwa.
Ere ki i ou Zanmi.
Apresye tou son bann zoli kado
E son lanmour enfini.
Mars avek Bondye leker kontan
Sant ek lakontantman.
Fer tou keksoz avek lazwa.
Touzour ador Zeova.

1. Nou leker tris, nou ti dan konfizyon,
Par bann lansennyman bann fo relizyon.
Me nou leker ti an selebrasyon,
Kan ti tann mesaz Rwayonm.

(REFREN)

*Pran kote Zeova, Rezoui ek li.
I pa pou rezet ou. Mars touzour ek li.
Anons nouvel lape Ek laliberte.
Son renny atraver Kris Pour leternite.*

2. Nou pe rezwir dan servis nou Bondye,
Proklanm laverite partou kote.
Akoz dimoun i bezwen deside
Pour pran kote ek Bondye.

(Refren)

3. Bann latak Satan pa pou efrey nou.
Lesparwar dan Zeova pou protez nou.
Menm nou group i pti, pour zot i bokou,
Nou kont lo lafors Bondye.

(Refren)

1. O Zeova, mon sipliy ou.
Oli ou, mon pe rod ou.
Mon santi mwan dezespere.
Pa les mon zenou tranble.

(REFREN)

*Larg ou fardo lo Zeova,
Asire ki i pou sov nou tou.
Bondye pou toultan la pour ou.
I fidel, i pou ed ou.*

2. Mon ti pou anvol lwen danze,
Si mon ti annan lezel,
Ed mwan siport mon bann traka,
Ou ki bon, zis e fidel.

(Refren)

3. Mon pe sipliy ou, Zeova,
Donn mwan lape, proteksyon.
Lafwa, lafors, i donn bann dous.
Pour fer fas lopoziyon.

(Refren)

1. Ziz mwan Senyer, get mon fidelite,
Mon gran konfyans dan ou e mon lentegrite.
Egzamin mwan e teste mon leker,
Pirifye mon lespri, aksepte mwan Senyer.

(REFREN)

*Tandis ki mwan, mon'n fini deside,
mars touzour avek ou, avek fidelite.*

2. Mon pa frekant bann mesan, bann manter.
Mon ay lasosyasyon ou bann lennmi Senyer.
Pa detri mwan ansanm ek bann mesan,
Bann dimoun koronpi ki fer koule disan.

(Refren)

3. Wi, mon kontan landrwa kot ou reste.
Ou ladorasyon pir i fer mwan vin zwaye.
Mon pou touzour mars otour ou lotel
E avek tou dimoun proklanm sa bon nouvel.

(Refren)

35 “*Verifye sa ki pli enportan*” (Filipyen 1:10)

1. Denozour i vremen pli enportan
Pour konn byen tou sa ki vre,
Tou bann keksoz ki vremen enportan
E sa ki nou devret fer!

(REFREN)

Kontan lebyen e ay lemal.

Fer li plezir.

Ki gran benediksyon ler nou aprann,

Konn e kontan

Fer sa ki pli enportan e bon!

2. Kwa ki pli enportan pour nou fer ki
Anons bon nouvel Rwayonm,
Rod bann dimoun ki swaf laverite
E ed zot trouv son semen?

(Refren)

3. Si nou vremen fer sa ki enportan,
Nou pou ere e zwaye.
Lape Bondye pou avek nou toultan
Nou lespwar pou asire.

(Refren)

1. Protez nou leker, sours lavi,
Evit semen pese.
Bondye ki egzamin leker
Konnen ki nou ete.
Leker i tret e tre move
I fer nou fer pese.
Les ou lespri gid ou leker
Par swiv semen Bondye.
2. Prepar leker pour rod Bondye
Sipliy dan lapriyer.
Remersye li e loue li,
Ouver gran nou leker.
Sa ki Bondye i ansenny nou
Nou devret obei.
Wi, devlop en leker fidel,
Sak zour, fer li plezir.
3. Gard leker kont move panse,
Egzamin sa ki vre.
Les son Parol tous ou leker,
Ou pou ganny fortifye.
Ya i kontan son pep fidel,
Sa i en garanti.
Ador li ek tou ou leker,
I pou vin ou zanmi.

37 *Servi Zeova avek tou ou leker*

(Matye 22:37)

1. O Zeova nou gran Lerwa,
Ou mon kontan, ou mon obei.
Ou merit tou mon devosyon,
Ou konfyans zanmen mon pou trai.
Mon pou swiv tou ou lord fidelman,
Tou ou dezir mon kontan fer!

(REFREN)

*O Zeova, ou merite,
En devosyon ki senser e vre.*

2. Papa, later i aklanm ou.
Tou ou kreasyon i rann ou glwar.
Mon fer en ve pour servi ou,
Pour fer konn ou non, i mon devwar.
Akoz promes mon dedikasyon,
Mon pou toultan fidel ek ou.

(Refren)

I pou fer ou for

(1 Pyer 5:10)

1. Rezon ki Bondye in donn ou laverite
E apel ou pour vin ver lalimyer.
I akoz i'n vwar sa dezir dan ou leker
Pour rod li e sa lanvi pour byen fer.
Ou'n promet pour fer son lavolonte.
Pour ed ou sak zour, i touzour pare.

(REFREN)

*I'n sov ou par disan Kris,
aprezan ou pour li.
Bondye pou gard ou ferm,
ou pa pou afebli.
Son bon gidans ek son proteksyon
ou pou santi
E ou pou ganny lafors.
Reste ferm kont lo li.*

2. Zeova in donn son sel Garson pour sov ou,
Se pour sa ki i le ou reisi.
Si i pa'n refize donn sa kado presye,
San dout i pou donn ou lafors osi.
I pa pou bliy ou lafwa ek lanmour.
I pou pran swen avek son pep touzour.

(Refren)

39 *Fer en bon non avek Bondye* (Eklezyast 7:1)

1. Wi tou nou lavi, Nou anvi servi byen,
Pour fer en bon non, Obei nou Souvren.
Nou le fer sa ki byen Devan lizye Senyer,
Nou a fer kontan Son prop leker.
2. Pour rod dan lemonn, Fason vin enportan,
Dezir son faver, Loner frekant bann gran.
I selman vanite. Akoz tel lanmitye,
Pou anpes nou ganny Faver Bondye.
3. Nou anvi nou non I dan memwar Bondye
Enskrir dan son liv Pour tou leternite.
Annou depan lo li, Defann son Parol sen
Pour gard en bon non Ziska lafen.

1. Pour lekel ou pe viv?

Ki Bondye ou adore?

Se li ki ou sef, fodre soumet.

I ou Bondye, se li ou met.

Pa trai ou Bondye,

Par servi lezot bondye.

Kontan ou Bondye ek tou ou leker,

Ki I vin ou sel Senyer.

2. Pour lekel ou pe viv?

Lekel ou pou adore?

Parski enn i fo e lot i vre,

Sa i ou swa pour deside.

Eski lemonn Sezar?

Ki napa okenn lespwar?

Eski ou pou ador sel vre Bondye

E fer son lavolonte?

3. Pour lekel mon pe viv?

Zeova mon adore.

Mon Papa dan lesyel mon servi.

San rezerv mon donn mon lavi.

Mon'n fini ganny aste

E mon'n fini vin pour li.

Sanmenm mon pou touzour obei li,

Sak zour, mon donn li laglwar.

41 *Silvouple ekout mon lapriyer*

(Psonm 54)

1. Ou mon Papa, ekout mon sanson.
Ou non i gran, san konparezon.
Ou mon Bondye, se ou ki mon Met.

(REFREN)

Silvouple ekout mon lapriyer.

2. Pour sa bon zour, merci bon Papa
Pour sa lavi, pour gid mon lepa.
Mon kontan ler ou pran swen ek mwan.

(Refren)

3. Bondye ed mwan pour fer touzour byen!
O Zeova, pa reste tro lwen.
Mon gro fardo, ed mwan siporte.

(Refren)

1. Zeova, nou Papa ki dan lesyel
 Ki ou gran non i touzour ganny sanktifye.
 Sa ki ou le, fer li arive.
 Nou priye ki ou Rwayonm i vini.
 Zour ek ler ou'n deside
 E beni limanite.
2. Mersi Bondye pour beni nou sak zour,
 Kado parfe i toultan sorti kot ou.
 Ou ki sours lavi ek lalimyer.
 Ou donn nou konnesans ek lasazes.
 Mersi pour pran swen ek nou,
 Mersi pour ou gran lanmour.
3. Dan sa lemonn, nou pas dan bann leprev.
 Nou tourn ver ou pour donn nou led ek lespwar.
 Papa, nou larg nou fardo lo ou.
 Donn nou lafors pour pa abandonnen,
 Kontinyen reste fidel,
 Ed nou pour gard nou promes.

1. Zeova nou loue ou, dir ou mersi.
Papa, nou tourn ver ou dan lapriyer.
Avek konfyans, nou servi ou fidelman,
Avek ou bon swen, nou byen prospere.
Sak zour nou fot i montre nou enparfe.
Pardonn e disiplin nou ek tandres.
Nou rekonesan ki ou'n sov nou lavi.
E ki ou pa oublie ki nou feb.

2. Nou apresye ou lanmour ek labonte.
Mersi pour fer nou vin pli pros ek ou.
Fer nou konn ou e ed nou pour servi ou.
Montre nou pour vin fidel e senser.
Nou rekonesan pour ou lespri pwisan.
E sa kouraz ou donn nou pour koze.
Ki bann ki dous i servi ou dan lazwa,
Mersi pour donn ou faver bann ki dous.

1. Zeova Bondye, mon sipliy ou,
 “Ekout mon demann.”
 Mon blesir i profon e
 mon fardo ensiportab.
Afebli, trouble, dekouraze
 e dezapwente.
 Bondye konpasyon, pran pitye
 mon leta deplorab.

(REFREN)

*O relev mwan pour kontinyen.
Ler mon dan dout, gid mon lepa.
Dan moman sonm, mon tourn ver ou.
Donn mwan lafors, O Zeova.*

2. Dan mon febles, ou Parol i
 mon refiz ek sipor,
 I eksprim mon bann santiman,
 kan mon pa kapab fer.
Rann ferm mon lafwa ek konfyans
 par mwayen ou Parol.
 Fer mwan rapel ou lanmour
 i pli gran ki mon leker.

(Refren)

1. La, meditasyon mon leker,
Ki mon bann panse lazournen
I fer ou plezir Zeova
E gard mwan ferm dan ou semen.
Kan bann traka i fatig mwan
E ki fer mwan perdi sonmey,
Les mwan touzour medit lo ou,
Osi lo tou ou bann mervei.

2. Nenport keksoz ki pir e vre,
Tou bon kalite ki annan,
Tou bon keksoz nou koz an byen
Ki fer mwan ganny lape toultan.
Papa ou panse i presye!
Konbyen, nou pa kapab konnen.
Mon pou medit lo ou Parol,
Pour konpran son mesaz pli byen.

Mersi Zeova

(1 Tesalonisyen 5:18)

1. Mersi Zeova, tou le zour, tou le swar,
Pour ou lalimyer ki ed nou pour vwar.
Mersi pour donn nou privez pour priye.
Nou kapab demann tou sa ki nou le.
2. Mersi Zeova pour donn nou ou Garson,
Ki'n ranport laviktwar dan tou fason.
Mersi pour gid nou pour kontinyen prese.
Pour nou reste fidel avek nou ve.
3. Mersi pour permet nou pres lo ou gran plan,
Sa i en privez ki nou kontan.
Mersi ki byento ou Rwayonm pou azir,
Pour tir tou soufrans e fer nou rezwir.

1. Priy Zeova ki ekout lapriyer.
Nou port son non, l'n donn nou sa loner.
Ouver ou leker ek li ou zanmi,
Touzour annan konfyans, depan lo li.
Priy Zeova toulezour.
2. Remersye li lefet ki nou vivan.
Demann li pardon pour tou nou mankman.
Ek konfyans, konfes ek nou Kreater.
I konnen ki nou'n fer ek lapousyer.
Priy Zeova toulezour.
3. Priy Zeova kan problem i kraz nou.
I nou Papa, i pa lwen avek nou.
Touzour rod konsey nou gran Protekter.
Konfye tou dan li e pa zanmen per.
Priy Zeova toulezour.

48 *Sak zour mars avek Zeova* (Mika 6:8)

1. Nou pran lanmen nou bon Papa
E mars ek li dan limilite.
Son labonte ki remarkab
I donn bann ki rod laverite!
I ofer nou son provizyon
Pour kapab swiv son gidans.
E nou fer nou dedikasyon
Pour nou servi li pour touzour.
2. Satan i vreman ankoler,
Vi ki lafen sa lemonn i la,
Nou fer fas ek lopoziyon
Ki kapab donn nou bokou traka.
Zeova i donn proteksyon,
Nou le reste pros ek li,
Pour nou servi li pour touzour.
E pour toulezour, kontan li.
3. Bondye in fourni led pour nou
Par son Parol ek son lespri sen,
Atraver tou kongregasyon
I tann lapriyer tou bann Kretyen.
Tan ki nou mars ek Zeova,
I ed nou fer sa ki byen
E pour imit son labonte.
Mars touzour dan sa bon semen.

49

Fer leker Zeova kontan

(Proverb 27:11)

1. Bondye nou'n donn ou nou lavi,
Ed nou fer ou lavolonte,
Pour fer ou leker rezouir
Nou pou touzour partisipe.
2. Ou lesklav fidel lo later,
Proklanm partou ou souvrennte
Par nouru nou touzour aler,
I ed nou fer ou volonte.
3. Ranpli nou ek ou lespri sen,
Pour nou servi ou fidelman
Pour nou loue ou O Souvren,
Fer ou leker touzour kontan.

1. Met lanmour dan mon leker
Tou don i sorti anler.
Pran mon lavwa, fer sante
Pour mon Lerwa ganny loue.
2. Pran mon lipye ek lanmen,
Fer zot swiv ou bon semen.
Pran mon larzan ek mon lor.
Pour donn ou laglwar, loner.
3. Ed mwan pour viv mon lavi,
Sirman mon pou anvi fer.
Touzour ou lavolonte
Tou sa ki fer ou zwaye.

51 *Dedye nou lavi avek Bondye!*

(Matye 16:24)

1. Zeova in atir nou tou ver son Garson,
Pour vin bann disip ki port son non.
Sorti kot tronn nou Bondye,
Laverite pe klere.
Nou lafwa in ogmante.
Nou donn nou lavi Bondye.

(REFREN)

*Nou'n dedye nou lavi ek Bondye, i nou swa.
Dan li ek Zezi nou pe trouv lazwa.*

2. Nou koz ek li dan lapriyer pour nou dir li
Nou pou obei e servi li.
Nou lazwa i vreman gran,
Pour partaz li, nou kontan.
Vi ki son non nou pe pran,
Nou pres lo Rwayonm toultan.

(Refren)

1. Parski Zeova in kree
En tre gran liniver.
Lesyel ek later i pour li,
Li menm zot Kreater.
I'n kre zonm e donn li lavi
E ansenny zot son drwa:
Pour ganny glorifye e adore
Konman zot sel Met ek Rwa.
2. Zezi ti batiz dan delo,
Profesi akonpli.
An priyan, i ti dir Bondye:
'Mon donn ou mon lavi.'
Kan i ti sorti dan Zourden
Konman Mesi Bondye,
Pour pare pour gard son lwayote
E fer son lavolonte.
3. Nou vin devan ou, Zeova,
Pour loue ou gran non.
Ek limilite, renons tou,
Swiv legzanp ou garson.
Ou byenneme ki ou'n ofer
Pour sov nou dan lanmor.
Nou nepli oule viv pour nou menm,
Pour ou, nou pare pour mor.

Prepar nou pour prese
(Zeremi 1:17)

1. Granmaten,
Nou met pare
Pour al pres sa bon nouvel.
I ankor fernwanr,
I konmans grenase.
I pa fasil pour sorti deor,
pa ankor.

(REFREN)

*Lespri pozitiv, preparasyon,
Priy tou dilon semen.
Sa i kapab donn motivasyon
Ki nou bezwen.
Nou pa tousel, bann lanz i gid nou.
Zezi ki dirize.
Avek enn nou frer akote nou,
Nou andire.*

2. Tre byento,
Nou pou zwaye
Si zis nou persevere.
Zeova i vwar
Sak zefor ki nou fer,
I pa bliye lanmour nou montre.
sa i vre.

(Refren)

1. I la semen lape,
 Semen ki ou’n konnen.
 Sa enn ki ou’n aprann,
 Sa enn ki nou bezwen,
 Ki Kris in ansenny nou
 Ler i ti lo later.
 Sa i semen lape,
 Ki dan Parol Bondye.

(REFREN)

*Semen lavi, I sa pli bon semen.
 Pour sanz semen, Pa ni menm mazine!
 Bondye pe dir nou: ‘La sa semen
 Pa get deryer, me wi, la sa semen.’*

2. I la semen lanmour,
 Nou pa bezwen rode.
 Bondye in montre nou
 Kot nou kapab trouve.
 Son lanmour gran e bon,
 Son lanmour dous e vre.
 La sa semen lanmour
 Ki pour lemonn antye.

(Refren)

3. I la semen lavi,
Pa fodre get deryer.
Nou Bondye in dir nou:
Napa pli bon semen
Pour trouv sa vre lape,
Pli bon semen lanmour.
Pran sa semen lavi,
Mersi Bondye touzour.

(Refren)

1. Touzour annavan, O mon pep,
Anons bon nouvel Rwayonm.
Pa bezwen per nou lennmi.
Dir tou bann ki ekoute
Par mon Garson, Lerwa Zezi,
Satan in ganny ranverse,
Byento i pou ganny ansennen,
Redonn liberte bann zonm.

(REFREN)

*Pa per, O mon bann byenneme,
Ni zot menas arogan.
Mon protez tou ki kontan mwan
Parey mon kannet lizye.*

2. Menm ou bann lennmi i bokou,
Zot menas e gognard ou,
Oubyen sey bat ou latet,
Par zot flatiri ek sourir.
Pa per zot mon fidel solda.
Menm persekisyon i dir,
Mon pou prezerv bann ki lwayal,
Ziska mon finaliz tou.

(Refren)

3. Kont lo mwan pour ou proteksyon,
Ou lafors ek boukliye.
Menm ou mor lo fron batay,
Mwan ki domin lo lanmor.
Pa per zot bann lennmi akoz
Mon kapab resisit ou.
Reste fidel ziska lafen,
Mon pou akord ou ou swe!

(Refren)

Viv laverite

(Proverb 3:1, 2)

1. Meyer fason viv se par swiv laverite.
 Personn pa kapab fer li pour ou.
 Alor swiv konsey ki Zeova i donnen.
 Krwar sa ki Bondye in dir nou.

(REFREN)

Viv laverite

Konman en realite.

Eksperyans lazwa,

Sorti kot Bondye

Kan ou viv laverite.

2. Zefor ki nou fer e letan nou depanse
 Dan servis Bondye ek son Rwayonm,
 Pou anmenn lazwa osi lavi enfini,
 Sa lavi perfe pour tou zonm.

(Refren)

3. Devan nou Bondye, nou parey bann pti zanfan
 Ki bezwen son konsey ek gidans.
 Annou touzour mars avek Bondye, nou Papa,
 Ki donn nou tou annabondans.

(Refren)

Anons mesaz avek tou sort kalite dimoun

(1 Timote 2:4)

1. Nou vreman anvi imit nou Bondye,
Nou konnen ki i pa fer preferans.
I le sov tou sort kalite dimoun
Pour vin pour li, i le zot ganny sa sans.

(REFREN)

I sa dimoun, pa lakaz

Son leker pa son vizaz.

Anons mesaz Bondye ek nenport ki.

Akoz nou kontan zot tou

Nou kontinyen pres partou:

“Pour tou dimoun kapab vin son zanmi.”

2. I pa enportan kote nou zwenn zot
Oubyen sa ki zot ti ete avan.
Sa ki vreman konte i zot leker,
Zeova i get sa dimoun anndan.

(Refren)

3. Zeova i anvi zot fer zot swa
Pour kit sa lemonn ek son fason fer.
Sa nou'n aprann e anvi partaze
Nou anons sa mesaz san lafrefer.

(Refren)

58

Rod dimoun ki kontan lape

(Lik 10:6)

1. Zezi ti donn lord: 'Pres laverite.'

Dan lasaler, dan lapousyer,

I ti les zot tou ekoute.

I ti kontan tou bann mouton Bondye.

I ti rod zot granmaten

ziska soley kouse.

Dan tou semen e portanport,

Nou koz ek tou sa ki nou zwenn

Ki byento tou bann problem pou disparet.

(REFREN)

Nou pe rode

Dimoun ki kontan lape partou,

Nou pe rode

Bann leker ki anvi ganny sove,

Nou pa anvi

Nou mank personn.

2. Letan i pas vit, kontinyen rode.

En milyon leker ek lavi,

Nou donn tou pour sov zis enn de.

Lanmour i motiv nou pour nou tournen.

Leker brize i ganny geri

e lavi sanze.

Nou rod dan pti ek gran lavil,

Nou'n menm trouv lentere lo zil,

Sa lazwa i motiv nou pour kontinyen.

(Refren)

1. Vin loue Ya,
Fer li tre for,
I donn nou lavi, tou keksoz ankore.
Nou toulezour,
Beni son non,
Son lanmour ek pwisans i vreman bon.
Nou sant louanz e fer konnen son non.

2. Vin loue Ya,
I satisfere
Nou bezwen e reponn nou lapriyer.
I soulaz bann
Ki fatige
E tou sa ki annan limilite.
Loue son non, Lo son pwisans, koze.

3. Vin loue Ya,
Nou Bondye zis,
Nou konfyans i dan Bondye lazistis.
I fer dibyen,
I pans leker.
Faver Zeova pou kouven later.
Vin loue li ek en leker senser!

1. La i sa bon letan
pour fer son lavolonte,
Pour pres ki son zour vanzans
i pros pour arive.

(REFREN)

*I pou ed zot, sov zot lavi,
Pa zis pour zot, nou osi.
Sa ki konte, obei ou.
Avek tou nasyon, nou prese,
Nou prese.*

2. I annan en mesaz
ki nou bezwen anonse.
Nou envit tou pour
rekonsilye avek Bondye.

(Refren)

(PON)

*I irzan, i enportan,
Ki zot antann, aprann e viv.
Koz ek zot e ansenny zot
Laverite, legzanp pour swiv.*

(Refren)

61

Annavan Temwen!

(Lik 16:16)

1. Ferm, determinen, dan sa letan lafen,
Bon nouvel pe ganny proklanmen par bann Temwen.
Menm zot ganny atake par Satan,
Bondye i ed zot pour reste ferm toultan.

(REFREN)

*Ale Temwen, annavan, reste touzour for!
Kontan ou servis sakre konman en trezor!
Dir lezot ki byento Paradi pe vini
E bann benediksyon Bondye osi.*

2. Solda Zeova, pa rod lavi fasil.
Larises ek faver sa lemonn initil.
Gard touzour nou leker senp e pir.
Nou lwayote, nou pou touzour mentenir.

(Refren)

3. Lespwar son Rwayonm in ganny met akote.
Son non sen, zot rod tou mwayen pour kritike.
Pran par dan son sanktifikasyon,
Par proklanm avek tou tribi ek nasyon.

(Refren)

1. Sant pour Zeova, Sant pour li en kantik nouvo.
Rakont son bann mervey E ki pou fer byento.
Koz lo son pwisans, Li menm ki Bondye laviktwar.
I ziz ek lazistis,
I pa abiz pouvwar.

(REFREN)

Sant, sant, sant!

Sant sa kantik nouvo!

Sant, sant, sant!

Pour Zeova Tre O!

2. Kriy avek lazwa, Pour selebre nou gran Souvren!
Sant en kantik zwaye, Pour loue son non sen.
Zwenn ek gran lafoul, Pour sant for devan nou Bondye.
Tronpet ek larp ek korn,
Lans zot bann son zwaye.

(Refren)

3. Sant bann son louanz, Lanmer ek tou sa ki ladan.
Zwenn bann ki lo later, Zot lavwa an santan.
Later rezouir, Bat lanmen tou bann larivyier.
Montanny, laplenn sante!
Loue nou Kreater.

(Refren)

1. Zonm i fer bann fo bondye
 E inyor sa Enn ki vre.
 I Bondye Tou Pwisan,
 Ki'n prouv li toultan.
 Zot bondye pa kapab vwar,
 Ki lavenir i'n prevwar.
 Zot bann Temwen i sipliy anven,
 Me zot zidol pa tann nanryen.

(REFREN)

*Wi, nou Temwen Zeova.
 Nou fyer annan sa manda.
 Pour loue Bondye vre profes,
 Ki touzour ganny akonplir.*

2. Nou fyer fer konn non Bondye,
 Bon nouvel son souvrennte,
 Temwanny son vre grander.
 Nou anons san per.
 Pour ed lezot aksepte
 E abandonn fo bondye.
 Proklanm son non lo later antye,
 Montre zot ki nou devoue.

(Refren)

3. Proklanm vre non nou Bondye,
Pour fer li ganny sanktifye.
Averti bann mesan
Ki blanm Tou Pwisan.
I pare pour pardonnen,
Si ver li nou retournen.
Pres son Parol i fer nou kontan,
Donn lespwar viv eternalman.

(Refren)

64 Pran plezir pour partisip dan rekolt (Matye 13:1-23)

1. La, nou pe viv dan letan rekolt,
En sezon san konparezon.
Plantasyon in pare pour rekolt,
Ofer nou partisipasyon.
Zezi ki ti konmans sa travay,
Par senm lagrenn dan plantasyon.
I sa gran privez ki nou'n gannyen.
Annou profit sa lokazyon.
2. Lanmour pour Bondye ek nou prosen
I pous nou pour fer plis zefor.
Prese e ansennyen i irzan,
Napa bokou letan ankor.
Ki gran lazwa nou pe resevwar,
Par donn Bondye tou nou sipor.
Persevere dan son travay Rwayonm,
I pou donn nou sa vre trezor.

1. Avanse, avanse, ver matirite!

Nou Bondye i anvi ki lalimyer i briye.

Fer ou mye pour amelyor ou minister,

Ou travay i pou beni.

Nou tou nou kapab partisipe.

Parey Zezi ti fer, pa bliye.

Depan lo Zeova pour ou pa tonbe.

Gard byen ou fidelite.

2. Avanse, avanse, dan predikasyon!

Sa bon nouvel eternal pres avek tou nasyon.

Pour donn laglwar Zeova, i touzour bon,

Kan nou pe al kazankaz.

Nou bann lennmi pou sey fer nou per.

Pa per, pa zanmen al an aryer.

Fer tou tann sa mesaz ki geri leker.

Dir zot ankor e ankor.

3. Avanse, avanse, touzour andire,
Dan sa travay Rwayonm,
devlop ou abilite.
Lespri sen pou donn ou sa motivasyon.
Apresye ou minister.
Kontan bann ki pou vin enn ou frer.
Persevere pour tous zot leker.
Kontinyen asiste zot pour fer progre
E fer briye lalimyer.

1. Dan lepase, zot ti'n kasyet laverite.
Laverite lo Mesi in ganny revele.
Akoz son konpasyon ek lanmour pour dibyen,
Zeova ti vwar leta pese bann imen.
Byento Bondye pou egzers son dominasyon,
Kot later pou ganny dirize
par son sel Garson.
I'n aranze pour donn li en nouvel marye,
En pti troupo ki I'n swazir e glorifye.
2. Sa bon nouvel ki nou prese ti'n ganny predir.
Pour ki Zeova i akonpli son dezir.
Ki son bann lanz i pran plezir pour anonse,
Bon nouvel Rwayonm, zot ed nou pour deklare.
Nou annan loner ek gran dezir ozordi,
Ede sanktifye son gran non
e pour loue li.
I en loner pour ganny apele son Temwen
Avek sa bon nouvel ki nou pe proklanmen.

'Anonse'

(2 Timote 4:2)

1. Bondye in dir nou proklanmen.
 I'n donn nou tou en travay pour nou fer.
 Tou lokazyon, annou anonse
 Sa zoli lespwar ki dan nou leker.

(REFREN)

*Al anonse,
 Pour later antye tande!
 Anonse,
 Lafen sa lemonn i pros.
 Anonse,
 Ed bann ki dous pour konpran.
 Anonse,
 Partou kote!*

2. Nou pou ganny problem ek soufrans,
 Persekisyon ek leprev i partou.
 I pa fasil me nou met konfyans,
 Dan Bondye, sa enn ki pli o ki tou.

(Refren)

3. Nou pou ganny rekolt ek pasyans,
 Si nou kontinyen ansenny ek lazwa.
 Annou proklanm mesaz delivrans
 Pour ede sanktifye non Zeova.

(Refren)

1. Vin partisip dan travay nou Met,
 Reponn son lapel, obei.
I pou donn nou son led ek gidans.
 I pou montre ou sa semen.
Lagrenn laverite i pe pouse
 Dan leker bann dimoun senser.
Alor donn ou meyer ler ou partisip
 Dan sa travay ki ou'n ganny donner.

2. Rezilta ou gannyen dan travay
 I depan lo ou byen souvan.
Ed tou bann ki pe ekoute pour
 Aprann e kontan sa ki vre.
Ed zot fer fas ek presyon ek doutans
 Ki zot pou sirman rankontre.
Nou pou kontan ler nou vwar laverite
 Grandi toulezour dan zot leker.

69 *Annavan serviter Rwayonm!*

(2 Timote 4:5)

1. Annavan nou pres lo sa Rwayonm
Ek tou dimoun lo later.
Ek lanmour pour prosen dan leker,
Akonpli nou minister.
I en gran loner servi Bondye,
Son parol nou pou anonse.
Al partou e kontinyen prese,
Koz lo non Bondye ki sakre.

(REFREN)

*Annou ale, pres sa
mesaz Rwayonm e reste fidel.
Wi, annavan ek devouman,
al anons sa bon nouvel.*

2. Ansanm kontinyen al annavan,
Bann frer Kris, lezot mouton.
Aze, zonm ek fanm, zenn tou ansanm
Ale dan predikasyon.
Bon nouvel Rwayonm ki pe vini
Fodre tou dimoun i tande.
Ek lafors Zeova nou pa per,
Lekel ki pa pou al prese!

(Refren)

1. Pour pres lo Rwayonm, Zezi in montre nou.
I'n ansenny nou konman pour fer:
Avek devouman rod tou dimoun partou
Ki pou kontan trouv sa vre boner.
Kot sak lakaz, dir tou dimoun en bonzour,
Ed zot konn lape sa bon nouvel.
Si zot pa kontan e pa resevwar ou,
Kit landrwa, touzour reste fidel.

2. Sa ki ekoute, ou osi ekout zot.
Zot leker, Bondye pou ouver.
E zot dispozisyon pour ganny vre lavi
Pou pous zot fer sa ki ou pe fer.
Pa zanmen enkyet lo sa ki ou pou dir,
Akoz Bondye pou ed ou koze.
Ou parol agreab e enteresan,
Pou tous bann ki anvi ekoute.

1. Wi, nou larme Zeova,
 Son Garson nou swiv.
 Menm Satan i opoz nou,
 Nou pe reste ini.
 Nou kontinyen fidelman,
 Pres partou kote,
 San okenn lafreyer
 Nou persevere.

(REFREN)

*Wi, nou larme Zeova,
 Enn avek Zezi.
 Nou anons ek lazwa,
 Son renny etabli.*

2. Nou serviter Zeova
 Ki rod son mouton,
 Ki'n perdi, dezespere,
 Bann ki dan labandon.
 Nou le ed e nourri zot
 Ler nou vizit zot
 E envit zot pour vin
 Kot Lasal Rwayonm.

(Refren)

3. Wi, nou larme Zeova,
Anba konmann Kris.
Byen ekipe pour batay,
Pour defann ladrwatir.
Nou reste ferm, vizilan,
Fidel e senser.
Dan leprev ek danze,
Nou pou andire.

(Refren)

1. Letan nou pa ti konn nanryen
Konsernan kondwit en Kretyen,
Bondye ti donn lalimyer,
Son Parol, Labib vre e kler.
Nou ti konpran son volonte,
Pour nou fer son servis sakre
E son grander glorifye
Pour ede fer son non ganny sanktifye.
Nou pe temwanny avek imen,
Dan zot lakour e lo semen.
Nou fer zefor pour etidye
Laverite ki fer nou lib.
Nou ansenny lo later antye,
Ador Bondye, wi Zeova.
Nou ini dan nou manda
Ziska nouvo lenstriksyon Zeova.

1. Ler nou koz lo ou gran Rwayonm,
Ler nou koz lo ou gran non,
Bokou zot i sey opoz nou
Zot oule fer nou boufon.
Me olye per sa bann zonm,
Se ou nou devret obei.
Nou sipliy ou donn nou ou lespri,
O Zeova, sa nou dezir.

(REFREN)

*Donn nou lardyes pour nou prese,
Nou lafreyer sirmonte.*

*Donn nou konfidans ek kouraz
Pour lemonn antye tande.*

*Armagedon pe vin pli pre
Ziska sa gran zour arive.*

*Donn nou lardyes pour nou prese.
Annou priye.*

2. Menm si nou annan lafreyer,
Ou rapel, nou lapousyer.
Me ou promes pour siport nou
I ed nou pour nou pa per.
Get bann menas zot pe fer,
Lakizasyon, persekisyon.
Ed nou tou pour ki nou kontinyen
Avek lardyes koz lo ou non.

(Refren)

74 Sant ansanm sa kantik lo Rwayonm!

(Psonm 98:1)

1. Sa en kantik lazwa ek gran laviktwar.
Pour loue Ya, nou Bondye ki siprenm.
Parol lespwar i ed nou reste fidel.
Sant avek nou e apresye son tenm:

(REFREN)

*'Ador Bondye devan son tronn.
Annou proklanm: Kris i Lerwa!
Aprann sante sa kantik lo sa Rwayonm.
Salye Bondye, loue non Zeova.'*

2. Vin proklanm son Rwayonm avek sa kantik.
Konman Lerwa, Kris i renny lo later.
Parey i'n dir, en nouvo nasyon in ne:
Bann zeritye akey Lerwa venker:

(Refren)

3. Kantik Rwayonm, bann dous i kapab sante.
Parol i kler, mesaz i rafresi.
Partou kote, bokou in etidye li
E envit tou pour zot vin aprann li:

(Refren)

1. Zonm in fann repros ek laont,
Dan tou fason lo non Bondye.
Enn i dir i feb e kriyel.
Lot i dir: “I pa egziste!”
Lekel ki pou defann son non
E fer tann son louanz partou?

(REFREN 1)

*“Senyer, la mon la! Anvoy mwan!
Mon pou sant e glorifye ou.
I en gran loner pour mwan, Senyer.
La mon la! Wi, anvoy mwan!”*

2. Zonm i dir Bondye i dousman,
Ni respe pour li zot napa.
Zot pe ador zidol an ros,
Swazir zonm konman zot lerwa.
Lekel ki pou averti zot,
Ki lager Zeova i pros?

(REFREN 2)

*“Senyer, la mon la! Anvoy mwan!
Pour ansenny zot ou zour i pros.
I en gran loner pour mwan, Senyer.
La mon la! Wi, anvoy mwan!”*

3. Bann dous pe zemir dan sagren,
Akoz lemal i ogmante.
Zot rod avek leker senser
Laverite, sours vre lape.
Lekel ki pou rekonfort zot
E pou ansenny zot ladrwatir?

(REFREN 3)

*“Senyer, la mon la! Anvoy mwan!
Pour ansenny zot ou ladrwatir.
I en gran loner pour mwan, Senyer.
La mon la! Wi, anvoy mwan!”*

1. Ki mannyer ou santi
 ler ou pres e ansennyen
 Avek zel ou'n fer ou par
 pour tous leker senser?
 Vi ki ou'n fer ou mye,
 leres ou les ek Bondye.
 I konnen leker senser
 tou bann ki kontan li.

(REFREN)

*Nou zwaye pour donn Zeova
 nou leker, lavwa ek lespri.
 Annou donn nou meyer pour Ya
 tou dilon nou lavi.*

2. Ki mannyer ou santi
 ler ou parol i atir
 Sa bann ki leker i drwat
 pour lavi eternal?
 Serten pa ekoute,
 lezot i ganny anbete.
 Me nou kontan port son non
 e kontinyen prese.

(Refren)

3. Ki mannyer ou santi
 akoz Bondye pe ed ou
E i pe fer ou konfyans
 pour ou fer sa travay?
Nou fyer pour pres avek
 bann parol ki fran me dous,
Pour rode bann ki senser,
 sa travay i irzan.

(Refren)

77 *Lalimyer dan en lemonn fernwanr* (2 Korentyen 4:6)

1. Denozour, sa bann zour move,
En lalimyer nou vwar.
Parey ler soley pe leve
Ki donn nou en lespwar.

(REFREN)

*I briye dan fernwanr,
Nou mesaz i eklere.
I donn lespwar, konfyans
I fer lannwit ale.
Sa promes i asire,
Wi, asire.*

2. Aprezan, bann ki pe dormi
Fodre lev zot deswit.
Nou prese, nou ankouraz zot.
Pour ki zot azir vit.

(Refren)

1. Gran i lakontantman bann ki
 Ansenny Parol Bondye.
 Benediksyon ki zot gannyen
 Pa kapab konpare.
 Nou fer parey Garson Bondye,
 Ansenny avek lanmour.
 Ler nou ansenny bann ki nou ede.
 Nou vin pros ek Bondye.
2. Nou ki ansenny Parol Bondye,
 Touzour fer sa ki byen,
 Koumsa i pou kler nou senser,
 Ki nou obeisan.
 Nou pran letan pour etidye
 Tou sa bann bon nouvel.
 Nou kontan partaz tou sa bann trezor
 ki nou’n gard aker.
3. Zeova i fer li posib
 Pour pres sa bon nouvel.
 Si nou priye pour ganny son led,
 Nou sir i pou tande.
 Nou kontan lir Parol Bondye,
 Asire ki i vre.
 Ansenny ek lanmour, byento zot osi
 zot pou ansennyen!

79 *Ansenny zot pour ki zot reste ferm*

(Matye 28:19, 20)

1. En lazwa pour ansenny son mouton
E pour vwar zot fer progre.
Nou'n vwar ki Zeova i ed zot
Pran aker laverite.

(REFREN)

Zeova, ekout nou priye.

Vey lo zot e pran swen ek zot.

O non Zezi, nou sipliy ou: Zot reisi

E ki zot tou zot reste ferm.

2. Toulezour nou priye pour zot tou,
Pour ki zot lafwa i for.
La nou fer tou pour pran swen ek zot,
Pour ki zot ferm dan leprev.

(Refren)

3. Wi ki zot mentenir zot konfyans
Dan Zezi ek Zeova.
E par zot landirans ek lanmour,
Zot a ganny rekonpans Ya.

(Refren)

80 “Goute e vwar konman Zeova i bon”

(Psonm 34:8)

1. Nou kontan servi Zeova
Pour prese i annan valer.
Rod letan pour donn Bondye nou meyer,
Ankor zefor nou bezwen fer.

(REFREN)

*Labib i dir nou: “Goute e vwar
Konman Zeova i bon.”
Lazwa devoue pour nou Bondye,
Nou konnen nou’n fer nou mye.*

2. Pour bann dan servis a plen tan,
Bann benediksyon i annan.
Depan lo Bondye pour zot bann bezwen,
Dan tou keksoz zot pou kontan.

(Refren)

1. Konmansman lazournen, soley pankor leve,
 Nou konmans nou zournen
 ankor demi sonmey, nou priye.

Nou fer en pti sourir avek dimoun nou zwenn.
 Serten i arete,
 serten i ale, nou nou reste.

(REFREN)

Sa lavi nou'n swazir.

Nou viv pour Zeova.

Nou fer tou sa ki i demann nou.

Ki swa lapli, soley,

Nou touzour andire.

Koumsa nou dir li toulezour: "Mon kontan ou."

2. A lafen lazournen, ler soley pe kouse,
 Nou fatigue me kontan,
 lazwa dan leker, nou priye.

Nou kontan sa lavi, toultan donn nou meyer.

Nou remersye Zeova

ki pe beni nou toulezour.

(Refren)

82 “Zot lalimyer i devret briye” (Matye 5:16)

1. Zezi ti dir nou tou
Kontinyen briye,
Klere parey soley
Pour rekonforte.
Lasazes ek lape,
Dan Parol Bondye.
Nou kontinyen anonse
Pour dimoun tande.
2. Avek mesaz Bondye
Annou tous leker.
Soulaz bann ki dan dey
Pour annan lafwa.
Lalimyer i gid nou
Pour servi Bondye.
Anons zot laverite
Pour zot fer zot swa.
3. Demontre labonte
Pou ganny apresye.
Nou parol atiran
Parey perl presye.
Briy ankor touzour plis
Toultan fer dibyen,
Bondye pou touzour beni
Travay ou lanmen.

1. Annou al devan sak laport,
Anons Parol Bondye.
Partou kote son bann mouton,
Fodre nou donn manze.
Parey Zezi Kri ti predir,
Mesaz Rwayonm Bondye
Pe ganny prese later antye
Par Kretyen devoue.
2. Kot tou lakaz, nou proklanmen,
Ki delivrans i pros.
Pour bann ki priy ek Zeova
E ki viv san repro.
Me konman zot pou konn son non
San ki zot ganny montre?
Alor annou proklanm partou
Non sa sel vre Bondye.
3. Alor, annou al kazankaz
Proklanm Parol Bondye.
Les sakenn fer son desizyon,
Si i pou aksepte.
Nou'n fer zot tann non Zeova,
Dir zot laverite.
Son bann mouton i ekoute
Letan nou al prese.

1. Zeova i konn nou bezwen
 Pour nou ere e reisi.
 I'n donn nou led ek provizyon
 Pour nou servi byen nou letan.

(REFREN)

*Donn koudmen e donn tou
 nou Bondye Tre O.
 Kot i annan bezwen, nou pou la,
 fer li ek lanmour.*

2. Y'annan travay pour fer partou.
 Kan neser, nou donn koudmen.
 Ek lentere, nou donn lanmen.
 Nou partaze, anvi ede.

(Refren)

3. Isi kot nou, dan teritwar,
 Nou plàn, konstri e progrese.
 Nou aprann en nouvo langaz
 E anmenn bon nouvel partou.

(Refren)

Akey lezot (Romen 15:7)

1. Byenveni tou ki prezan ozordi.
Ekout Parol Bondye pour konn li.
I ofer nou tou lavi eternel.
Avek rekonesans nou reponn son lapel.
2. Mersi Bondye pour tou nou frer ek ser,
Pour lakey ek led ki zot ofer.
Annou kontinyen apresye zot tou
E akey tou lezot ki isi avek nou.
3. Bondye i envit tou limanite,
Bann ki senser konn laverite.
Par son sel Garson, i pe atir nou.
Ouver gran nou leker pour akey lezot tou.

1. Vini! Pran plezir konn Zeova, nou Senyer.
 “Bwar delo lavi,” lespri i dir nou.
 Pran vre konnesans, Bondye i ofer.
 Rod laverite, i annan pour tou.
2. Pa negliz asiste bann renyon ki ganny fer,
 Vin ganny enstrir tou sa ki zis e vre.
 Avek lespri sen, ansanm ek nou frer,
 Pour nou ganny kouraz, pour swiv laklerte.
3. Kantik louanz i en lazwa pour ekoute!
 Parol bann ki saz i parey dimyel!
 Touzour zwenn ansanm avek pep Bondye.
 Wi, kontan parmi bann frer spirityel.

1. Nou viv dan en lemonn ki'n perdi kontrol,
Ki osi pa konn nou Bondye.
Nou bezwen Son bon gidans pour protez nou
E pour byen diriz nou lipye.
Nou bann renyon i rafresi nou lespwar
E batir nou lafwa dan Li.
Bann parol ki pous nou pour fer sa ki byen
E donn kouraz pour kontinyen.
Nou pa pou zanmen bliy komannman Bondye,
Nou pou fer son lavolonte.
Nou bann renyon i ansenny nou sa ki byen
E pour kontan laverite.
2. Zeova i konn tre byen tou nou bezwen.
Son konsey nou bezwen tande.
Si nou saz e met konfyans dan son Parol,
Nou pou vin tou nou lasanble.
Avek bon lenstriksyon par bann zonn matir,
Nou aprann montre nou lafwa.
Ek sipor lanmour nou fanmir dan lafwa,
Nou konnen ki nou pa tousel.
Anmezir ki nou esper sa pli bon zour,
Nou pou zwenn avek bann fidel.
Dan tou bann renyon nou pou aprann pour viv
Ek sazes sorti dan lesyel.

(Psonm 25:4)

1. Zeova nou Bondye, nou la rasanble.
Nou'n aksepte ou lenvitasyon.
Ou Parol i sen, en lalanp ki klere
E sours sa pli bon ledikasyon.

(REFREN)

*Ed mwan konpran e montre mwan semen,
Fer mon zorey tann ou konsey pli byen.
Ed mwan mars dan semen laverite
E fer mwan kontan ou lalwa parfe.*

2. Ou lasazes i sitan gran O Bondye,
Ou bann zizman i rekonfortan.
Ou Parol i sen e vreman merveye,
Ou Parol pou reste pour toultan.

(Refren)

1. Si nou ekout Kris, eski nou pou montre
Son lansennyman i ekler nou semen?
Nou kontan pour konnen par byen ekoute,
Ere bann ki gard sa ki zot konnen.

(REFREN)

Beni, si ou ekoute

Kan ou tann Parol Bondye.

Si ou anvi fer son lavolonte,

Beni, si ou ekoute.

2. Nou bon fason viv i parey en lakaz,
Konstri lo ros e non pa lo disab.
Si nou aplik sa konsey Zezi ki saz,
Nou lavi pou reste solid e stab.

(Refren)

3. Parey en plant pre delo i byen pouse
E raport bann fri pandan sak sezon,
Si nou obei parey zanfan Bondye,
I pou donn nou tou son benediksyon.

(Refren)

1. Par ankouraz lezot pour servi
Zeova ek fidelite,
Nou lanmour pour nou frer pou pli for.
Anmenn lape ek linite.
Lanmour parmi serviter Bondye
I donn kouraz pour andire.
Nou kongregasyon i en refiz,
En vre landrwa sekirite.
2. En bon parol dan moman detres
I rekonfortan pour tande.
Wi sa bann parol konsolasyon,
Zanmi dan lafwa ki koze.
I vreman gou pour travay ansanm
Ek bann ki partaz menm lespwar!
Nou kontan fer dibyen kanmarad,
Ed nou bann frer i en devwar.
3. Avek nou lizye lafwa nou vwar
Gran zour Zeova aprozé.
Fodre ki nou mars touzour ansanm
Lo sel semen laverite.
Ini ek pep Zeova Bondye,
Servi li pour leternite.
Kontinyen ankouraz kanmarad
Pour kapab gard lentegrite.

1. Bondye ozordi sa zour,
 Ek tou nou leker pe priye.
 Loner ek faver ou'n ofer nou,
 Enposib konte!
- Sa travay, avek lanmour,
 Par ou, in touzour ganny beni.
 La, debout en lakaz byen konstri,
 Nou'n kapab fini.

(REFREN)

O Zeova, ki gran privelez

Fer sa lakaz an ou loner!

Permet nou reste dan ou servis tou nou lavi,

Rann ou glwar par sa ki nou fer.

2. Nou ranpli avek lazwa,
 Nou'n rezouir vre lanmitye,
 Sa bann bon souvenir pou reste
 Pour leternite!
- Ou lespri sen in gid nou,
 Pour nou travay dan larmoni.
 Par fer plis dimoun konn ou gran non,
 I sa pli gran pri!

(Refren)

1. O Zeova, ki pli gran loner
 Konstri sa lakaz an ou non!
 Nou ofer ou avek gran lazwa
 Pour ou laglwar ek ou gran non.
 Nenport kwa ki nou pou prezant ou,
 Ou ki lasours, O Kreater.
 Mendev, abilite, materyo,
 Nou donn ou ek tou nou leker.

(REFREN)

*Wi, nou prezant ou sa lakaz,
 Landrwa kot ou ganny loue.
 Nou dedye ou sa batiman,
 Aksepte li, silvouple.*

2. Permet nou loue ou, O Papa!
 Ek kantik, ranpli sa lasal.
 Fer ki ou laglwar i agrandi
 Ek bann nouvo ki ay lemal.
 Dedye sa plas zis pour ador ou,
 En o standar nou pou gard li.
 Ki sa lakaz i touzour onor
 Nouvel lo Rwayonm etabli.

(Refren)

1. Beni nou tou isi prezan,
Zeova nou sipliy ou.
Mersi pour tou nou bann renyon.
Les ou lespri diriz nou.
2. Wi, nourri nou par ou Parol,
Ed nou fer progre, Senyer.
Form nou pour vin bann bon temwen.
Lanmour ranpli nou leker.
3. Wi, Papa, beni nou renyon,
Ed nou viv dan linite.
Fer par nou parol ek aksyon
Promot ou gran non sakre.

94 *Rekonesan pour Parol Bondye* (Filipyen 2:16)

1. Zeova, nou Papa, nou le ou konnen
Kantite nou apresye ou Parol sen!
Sa bann Parol enspire
e vre in liber nou.
I parey en lalanp ki touzour gid nou.
2. Ou Parol i pwisan, i tous o profon.
I separ nou panse ek motivasyon.
Ou lalwa i kler, parfe,
tou ou zizman i sir.
Ou prensip i ed nou annan ladrwatir.
3. En mesaz senp ki tou i kapab konpran.
Ekri par zonm ki annan menm santiman.
Ed nou reste fidel
e pour toultan medite.
Mersi Papa pour sa kado merveye!

1. Profet lontan ti anvi aprann lo Kris,
 Lespwat pou kreasyon ki soufer.
 Lespri sen ti revel larive Mesi,
 Atraver li nou sorti venker.
- La konmela, Zezi Kri pe dirize,
 Siny son prezans i evidan.
 Ki gran faver pou aprann konn tousala,
 Menm bann lanz ti a kontan konpran!

(REFREN)

*Nou semen pou touzour vin pli kler.
 Nou mars dan lalimyer sak zour.
 Get sa ki Bondye in revele.
 I gid nou lepa toulezour.*

2. Nou Senyer in apwent en lesklav fidel,
 Par ki I donn nou manze toultan.
 Lalimyer laverite in vin pli kler,
 I tous leker e donn disernman.
- Nou santye i kler, nou lepa i pli ferm,
 Nou mars dan lalimyer touzour.
 Mersi Zeova, Sours tou laverite,
 Nou mars dan ou santye ek lanmour.

(Refren)

1. I annan en bon liv ki dan son bann paz,
I donn nou lape, lazwa ek lespwar.
Son panse merveye i telman pwisan,
I fer bann “mor” leve, bann “aveg” vwar.
Sa liv presye i Parol Bondye, Labib.
Ekri par zonm, enspire par Bondye,
Bann zonm ki ti vreman kontan Zeova,
Ki par son lespri ti ganny eklere.

2. Zot in ekri lo kreasyon liniver,
Ki par son pouvwar, Ya in etabli.
Leta parfe ki premye zonm ti ete,
Me apre i'n perdi son Paradi.
Zot in koz lo en lanz an partikilye
Ki ti konteste souvrennte Bondye.
Par maler zonm osi ti zwenn avek li,
Me byento Zeova pou triyonfe.

3. Nou pe viv en letan lazwa ek lespwar.
Rwayonm i la ek Kris konman Lerwa.
I letan ki pep Bondye i anonse
Tou bann benediksyon avek lafwa.
Labib i kontyen bann mesaz merveye,
En gran festen pour tou bann ki lafen.
I ofer lape ki san konparezon,
Fouy sa Trezor Vivan i pour nanryen.

Viv lo Parol Bondye

(Matye 4:4)

1. Lavi i depan lo Bondye,
Lo tou sa ki i'n dir.
Nou devret viv lo son Parol,
Pa selman lo dipen.
Zwaye e anpe ozordi
E pour touzour beni.

(REFREN)

*Pa bezwen viv zis lo dipen,
Viv lo Parol Bondye.
Nou ganny tou sa ki nou bezwen,
Viv lo Parol Bondye.*

2. Bann levennman ki'n arive
Ek dimoun lepase.
Bann zonm ek fanm vreman fidel
Ki ti annan lardyes.
Bann legzanp ki ankourazan
Ki ed nou andire.

(Refren)

3. Kan nou lir Labib toulezour,
Nou ganny rekonforte.
Kan nou fer fas avek leprev,
Lasazes i ed nou.
Ki nou gard o fon nou leker
Tou sa ki i'n dir nou.

(Refren)

98 *Tou Lekritir i enspire par Bondye*

(2 Timote 3:16, 17)

1. Labib sen i en lalimyer
Ki kler nou lo sa later.
Par obei li fidelman,
Nou pou santi nou lib toultan.
2. Parol Bondye i enspire,
I ansenny prensip Bondye.
Touzour itil pour motiv nou,
Ansennyen e disiplin nou.
3. Par mwayen son Parol sakre,
Nou'n konn vre lanmour Bondye.
Fodre nou lir li toulezour,
I a gard nou vivan touzour.

1. Milyon frer ek ser nou annan,
Zot tou zot la, gete.
Zot en bann temwen fidel,
Pe gard lentegrite.
Dan sa gran larme pwisan,
Nou la, plizyer milyon,
Sorti partou dan kat kwen lemonn,
Nou loue nou Bondye.
2. Milyon frer ek ser nou annan,
Nou pres partou kote
'Bon nouvel nou anonse,'
Pour ki tou i tande.
Nou pou kontinyen prese,
Malgre difikilte,
Zezi ti ed tou ki epwize,
I donn repo, lape.
3. Milyon frer ek ser nou annan,
Bondye i vey nou byen.
Anba son bon proteksyon,
Nou servis pa anven.
I annan plizyer milyon
Ki pres avek viger,
Nou bann koleg travay Zeova,
Isi lo sa later.

100 *Resevwar zot avek lospitalite* (Akt 17:7)

1. Zeova i montre lospitalite.

I pran swen ek nou san fer lapreferans.

Son lapli ek soley,

i pa refiz personn.

I fer nou annan lakontantman.

Kan nou touzour ed bann ki mwen fortinen,

Konman zanfan, nou imit nou Papa sen.

I pou rekonpans nou ler

nou ed nou prosen

E demontre labonte senser.

2. Nou pa zanmen konnen kantite byenfe

Ler nou ed dimoun mizer ki dan bezwen.

Menm ki zot etranze

ek lospitalite,

Nou pare pour konble zot bezwen.

Parey Lidi dan liv Akt, nou dir: 'Antre.'

Kan zot vin kot nou, zot pou repoz anpe.

Nou Papa i konn byen

tou sa bann bon dimoun

Ki imit son zenerozite.

101 *Travay ansanm dan linite*

(Efezyen 4:3)

1. Dan lemonn Satan ki ay nou,
Bondye in rasanble nou tou.
Annan linite ek lape,
Boner partou kote.
Apresye linite,
Larmoni i bon.
Travay Zeova i bokou
E son garson pe diriz nou.
Annou obei, servi li,
Touzour dan larmoni.
2. Kan nou priy pour reste ini
E kontinyen ed nou zanmi,
Lanmour, pardon pou agrandi,
Lazwa, lape osi.
Lape i rafresi,
Sa i fer plezir.
Si nou montre lanmour Kretyen,
Lape Bondye nou pou gannyen.
Son led pou inifye nou tou,
Pour servi li touzour.

1. Bann defo ki nou annan,
I vremen bokou.
Pourtan Bondye i touzour
Pran swen avek nou.
I annan konpasyon,
Son lanmour i imans.
Demontre sa menm lanmour
Bann ki dan soufrans.
2. Nou kapab santi nou feb
Dan serten moman.
Par disan Kris nou'n sove,
Nou'n ganny libere.
Bann feb i pour Bondye,
I kapab fer zot for.
Dan moman detres, ed zot
Trouv lazwa ankor.
3. Plito kondann bann ki feb,
Annou demande
Konman pour fortifye zot,
Tret zot ek pitye.
Met lafwa an aksyon,
Donn led apropiye.
Par mwayen nou bon sipor,
Zot a releve.

*Bann berze, bann zonm
konman kado*
(Efezyen 4:8)

1. Dan lavi, Zeova i donn nou
 Bann berze ki vey nou.
 Par zot bon legzanp, nou ganny gide
 Lo konman pour marse.

(REFREN)

*Bondye in donn bann zonm byenneme,
 Ki fidel osi senser.
Pour pran swen son bann mouton presye.
 Apresye sa ki zot fer.*

2. Berze ki kontan e konpran nou,
 Ek douser zot gid nou.
 Zot pans nou douler dan tou moman
 Par parol konsolan.

(Refren)

3. Zot donn touzour bon konsey Bondye,
 Gard nou lo son santye.
 Fer nou viv en bon lavi touzour
 Par servi li sak zour.

(Refren)

104 Lespri sen, en kado sorti kot Bondye

(Lik 11:13)

1. Souvren, Zeova, Papa konpasyon,
Ou pli gran ki nou leker pese.
Soulaz nou fardo, apez nou tourman.
Par ou lespri nou ganny rekonforte.
2. Papa, nou tou nou arive fer fot
E osi nou perdi lekilib.
Bondye, nou priy ou: Silvouple donn nou
Sak zour, ou lespri sen konman nou gid.
3. Kan nou fatige, fay, dekouraze,
Ou lafors aktif pou relev nou.
Donn nou lafors parey leg pour monte.
Akord ou lespri sen avek nou tou.

1. Bondye lanmour i dir nou tou:
‘Mars dan mon semen lanmour.’
Kontan Bondye ek nou prosen,
I pous nou fer byen sak zour.
Lanmour i sours nou legzistans,
Ansenny nou vre bi lavi.
I reflekte dan nou parol.
Lanmour pa zanmen fini.
2. Lanmour Bondye ek ladrwatir
I ganny prouve par aksyon.
I ed nou sirmont nou febles
E sanz nou move fason.
Lanmour i pasyan, siport tou,
I pir e i pa groker.
Pour apresye gou vre lanmour,
Aprann kontan plis nou frer.
3. Zanmen les laenn vin ou met,
Zanmen les li kontrol ou.
Pran Bondye konman ou sel gid,
Son prensip pou diriz ou:
Lanmour Bondye ek ou prosen,
Fodre i senser e vre.
Demontre pour lezot lanmour
Parey sa ki pour Bondye.

1. Dan lapriyer nou demann Bondye
 Pour devlop tou son bann kalite.
 Me pli enportan ki tou, lanmour
 Ki nou ganny gras a son lespri sen.
 Nou talante, ardyese e saz,
 Me san lanmour i vreman domaz.
 Nou priy pour ganny vre lanmour senser,
 Dan tou sa ki nou dir oubyen fer.

2. Lanmour i toultan rod pour donner
 E pour fer sakrifis pour lezot.
 Lanmour pa les laenn devlope,
 Lanmour i pare pour pardonnen.
 Lanmour i ed nou pour andire
 E fer fas avek difikilte.
 Dan tou problem ek leprev, rapel
 Ki lanmour i reste pour touzour.

107 *Legzanp lanmour Bondye*

(1 Zan 4:19)

1. Legzanp vre lanmour, Zeova in donn nou.
I gid nou, wi gid nou.
Son fason azir, dan tou sa ki i'n fer,
I montre nou sa vre lanmour.
Bondye in donn nou, son Garson pli presye
Pour efas pese, pour nou ganny pardonnen.
En lanmour imans, lanmour enkonparab!
Bondye lanmour, Legzanp vre lanmour.
2. Kan nou swiv Bondye, lanmour pour kanmarad
Pou fidel, byen fidel.
Nou pou anvi pran swen avek tou nou frer,
Zenn konman vye, pa zis enn de.
Nou pa pou swazir ant swa kontan Bondye
Ouswa kanmarad, tou le de i presye.
Nou toultan pare pour pardonn fot lezot
Akoz lanmour Pour nou frer ek ser.
3. Lanmour pour Bondye i soud nou tou ansanm,
Fer nou vin en fanmir.
Papa Zeova i dir avek nou tou:
"Goute e vwar vre linite."
Zwenn ansanm ek nou, lazwa i parmi nou.
Vin pli meyer par Labib ek lespri sen.
Nou bann frer ek ser i la pour rapel nou,
Legzanp lanmour, Bondye i lanmour.

1. Zeova i lanmour.

Vre sours lanmour i dan lesyel.
Gras a son Garson byenneme,
I'n pey ranson pour bann imen
Ganny lespwar lavi eternal.
Wi, lavi ere lo later.

(REFREN)

*Zot tou, bann ki swaf isi,
Vin bwar sa delo lavi.
Wi, vin bwar i pour nanryen.
Bondye ki donn imen.*

2. Zeova i lanmour.

Tou son aksyon i en laprev
I'n kontinyen kontan imen,
I'n donn Zezi Kri son Rwayonm.
Pour akonpli son zoli plan.
La, Son Rwayonm in arive!

(Refren)

3. Zeova i lanmour.

Annou montre sa menm lanmour.
Ed bann ki dous pour zot swazir
Sa sel vre semen lardwatir.
Pres avek lardyes ek respe
Pour zot tande partou kote.

(Refren)

109 *Kontan lezot avek tou ou leker* (1 Pyer 1:22)

1. Kan lanmour i senser e vre,
 Nou fer leker Bondye zwaye.
Lanmour, son pli gran kalite
 Ki nou byen apresye.
Leker ranpli ek lafeksyon,
 Nou ganny zanmi fidel e bon.
Lanmour i met premye lezot,
 Toultan senser ek zot.

Nou la pour donn en koudmen,
 En zanmi ki nou vwar dan bezwen.
Montre ou en vre zanmi,
 En dimoun ki konpran byen.

Zezi ti ansenny vre lanmour,
 Ki Zeova i kontan nou,
I tous nou leker, motiv nou.
 Annan santiman profon,
Kontan ek tou ou leker.

1. Bann siny letan pe anons Rwayonm Bondye.
Fodre nou fer proklanmasyon.
Lev ou latet e esper ou delivrans.
Nou pros avek liberasyon!

(REFREN)

*Lazwa Zeova i nou latour for.
Sant for e kriy avek lazwa.
Selebre lespwar, montre lapresyasyon,
Donn loner e loue Zeova.
Lazwa Zeova i nou latour for.
Ki tou dimoun i konn son non.
Reste devoue pour Bondye ek Lerwa,
Zwaye dan nou servis pour son non.*

2. Tourn ver Bondye, ou ki kontan Zeova.
I tou pwisan, pa bezwen per.
Debout ek lavwa osi for ki loraz.
Sant kantik zwaye pour Senyer!

(Refren)

1. Rezon pour nou zwaye i bokou
E i touzour pe ogmante.
Bann dimoun presye tou bann nasyon
Pe zwenn ek nou later antye.
Lazwa dan nou leker i profon,
I sorti dan Parol Bondye.
Nou ganny nourri ek li toulezour
E nou lafwa i devlope.
Rezon nou zwaye i byen profon,
Parey labrez i bril dan nou.
Menm difikilte i tap nou for,
Bondye donn landirans nou tou.

(REFREN)

*Zeova Bondye, nou lazwa,
Tou sa ki i'n fer, nou plezir.
Profon son panse e gran son travay,
Avek labonte ek pwisans!*

2. Nou kontan admir son bann mervey,
Lesyel, later ek losean.
Nou admir son liv lo kreasyon,
Aplodir son travay tre gran.
Nou pe selebre e rann li glwar,
An proklaman Rwayonm Bondye.
Deza etabli ek son byenfe,
Nou proklanm li lemonn antye.
Pros i selebrasyon eternel,
Parey lizour ki swiv lannwit.
Nouvo lesyel ek nouvo later
Lazwa eternel par laswit.

(Refren)

1. Zeova, ou lanmour,
Sa Bondye ki donn lape.
Nou priye pour ganny ou lafors
E devlop fri lespri sen.
Lafwa dan ou Garson
Ki touzour fidel e vre
Touzour donn nou ou lanmitye
Pour ki nou toultan anpe.
2. Lespri sen i ede
Ou Parol i eklersi.
Nou ganny gide e proteze
Dan sa lemonn koronpi.
Ziska ler kot maler
Ek tou lager pou nepli,
Silvouple ki ou lespri sen
I ed nou reste anpe.
3. Tou bann ki ou kontan,
Dan lesyel ek lo later,
I ini gras a ou lespri
Pour anons nesans Rwayonm.
Rwayonm Bondye ki zis
Pou met lafen ek maler.
Alor bann ki dous pou kontan
Viv dan lape pour touzour.

1. Loue Ya, Bondye lape
Ki gard nou ini.
I pou aboli lager,
Anmenn larmoni.
Prens lape Kris i ranpli
Avek labonte.
Aprè son viktwar final,
I lape perfe.
2. Nou aret lager, dispit
Ek larm lakoler.
Fer zarm lager vin zouti
Pour kiltiv later.
Fodre touzour pardonnen
Pour gard vre lape.
Zis parey mouton Zezi,
Aprann viv anpe.
3. Fodre nou pourswiv lape
Ki Bondye donnen.
Obei son komannman
Ki fer nou zwaye.
Nou mars lo semen lape,
Ki mark vre Kreyen
Ziska lape renny partou
Anba nou Souvren.

1. Zeova, Souvren Senyer,
I devoue pour son non sen.
I anvî retir lo li
Blanm ki Satan in anmennen.
Tou sa letan ki'n pase,
I touzour pe andire
Ek pasyans ek labonte,
I pankor fatigue.
I oule ki tou imen,
I aksepte pour ganny sove.
Alor, gran pasyans Bondye
Pou'n definitivman pey fre.
2. Pour reste lo bon semen
Pasyans i vreman nesaser.
I gard nou leker anpe,
Ed nou pour pa pran lakoler.
Vwar sa ki byen dan lezot,
Esper touzour lemeyer.
I gard nou ekilibre
Letan nou dan maler.
Avek lezot kalite
Ki nou'n gannyen par lespri sen,
Pasyans pou vreman ed nou
Imit Bondye ki nou konnen.

115 *Lapresyasyon pour pasyans Bondye* (2 Pyer 3:15)

1. Zeova Bondye, ou Tou Pwisan.
Ou ki kontan zis sa ki byen.
Mesanste in kouver later,
I fer lapenn, sa ou konnen.
I annan ki dir ou tro tarde,
Lafen i pros, zot pa okouran.

(REFREN)

*Nou get lavenir ek lespwar,
Ou non nou apresye e loue.*

2. Mil an i ganny konpare par ou,
Zis parey en zour vennkat-r-er.
Letan i pros pour ou gran zour,
Akoz lafen pa pou tarde.
Menm ou deteste tou vyolasyon,
Ou kontan kan peser i sanze.

(Refren)

1. Bondye Zeova nou le loue ou,
Akoz Labib i dir
Ki menm si ou vreman saz e pwisan,
Ou toultan annan labonte.
2. Zezi i envit bann ki ganny kraze
Kit zot fardo deryer.
Son zoug i fasil, dan leker i dous,
I touzour bon e siport nou.
3. Nou vwar bon legzanp Zezi, Zeova,
Konman nou devret viv.
Annou demontre pouvwar labonte
Dan lafason nou tret lezot.

1. O Zeova, Bondye ki bon,
Toulezour ou beni nou!
Ou sen touzour fidel e bon
Ou aksyon i merveye.
Ou montre pardon e pitye,
Menm plis ki nou merite.
Nou kontan pour nou servi ou,
Ou diny pour ganny adore.
2. Bann dimoun ki ou'n swazir i
Reflekte ou labonte.
Dan tou zot kondwit ek aksyon
Sa bon nouvel zot prese.
Ou bon lansennyman ek berze
I fer dibyen tou dimoun.
Donn nou ou lespri sen pour nou
Azir avek labonte.
3. Ed nou demontre labonte
Dan tou sa ki nou pou fer
Anver tou nou bann frer ek ser,
Tou sa ki nou rankontre,
Dan nou fanmir, kongregasyon,
Dan sak vilaz, sak kanton
Ki ou lespri sen i ed nou
Montre touzour labonte.

1. Akoz nou lenperfeksyon, O Zeova,
Tandans nou leker i touzour move.
I fasil pour pese met nou dan latrap
Si nou napa lafwa dan nou Bondye.

(REFREN)

*O Zeova, donn nou touzour plis lafwa.
Donn nou ou led zis dapre nou bezwen.
Donn nou lafwa, selon ou gran konpasyon,
Pour onor ou, par dir e fer dibyen.*

2. San lafwa i pa posibil fer ou plezir.
Lafwa dan ou, i anmenn rekonpans.
I protez nou, parey en vre boukliye
Pour fer fas ek lavenir ek konfyans.

(Refren)

1. Bondye ti koz avek zonm tre souvan
Atraver son profet lontan.
Prezan i demann tou pour repantir,
Par son Garson nou'n ganny dir.

(REFREN)

Eski nou lafwa i solid?

Pour sirviv devlop vre lafwa.

Nou prouv nou lafwa par aksyon.

Pour ganny lavi, devlop sa vre lafwa.

2. Nou pran plezir swiv komannman Zezi,
Nou pe anons Rwayonm Bondye.
Nou pa per pour nou koz avek lardyes,
Touzour koz laverite.

(Refren)

3. Nou lafwa i donn nou sekirite,
Zanmen nou pou ganny anbete.
Menm si bann lenmi i persekit nou,
Proteksyon, i asir nou.

(Refren)

1. Zezi Kri, sa pli gran zonm ki'n egziste,
Pa ti vantar, orgeye e anbisyé.
Touzour pare pour akonplir plan Bondye,
Pare pour demontre vre limilite.
2. Ou, ki pour lezot pe travay vreman dir,
'Vin anba mon zoug,' Zezi i envit ou.
Si ou rod Rwayonm ou pou ganny soulazman.
Bann ki dous e drwat, Senyer i kontan tou.
3. Zezi ti dir son disip, 'Zot tou zot frer,'
Soumet anba ou Met e servi lezot.
Bann ki dous e drwat i presye pour Bondye,
Lavi eternal Senyer in promet zot.

1. Nou kontan Bondye dan tou nou lavi.
Les nou ganny kontrole touzour par lespri.
Okip laser i donn gro problem.
Okip lespri i evit lapenn.
2. Satan i tant nou lazournen antye.
Lalwa pese i fer nou perdi santye.
Lalwa Bondye i sirmont pese.
Nou reisi avek led Bondye.
3. Nou bezwen mazin son repitasyon.
Avek tou sa ki mal, nou dir touzour non.
Dan tou aksyon, fer tou nou zefor,
Pour annan kontrol lo nou lekor.

1. Zanmen lemonn in dan problemm koumsa.
Dimoun i per sa ki pou arive.
Reste ferm, pa enkyet aköz traka,
Fidelman, servi Bondye.

(REFREN)

*Fodre nou ferm e solid,
Sa lemonn nou rezete.
Reste toultan fidel,
Pour lavi eternal.*

2. Pyez ek tantasyon pe ranpli lemonn.
Gard byen nou panse pour nou reziste.
Pa larg Bondye pandan lemonn pe fonn,
Li ki nou sekirite.

(Refren)

3. Servi Bondye ek nou leker antye.
Annou partisip dan servis Senyer.
Pres bon nouvel, pa larg li, i presye.
Sa lemonn pou an pousyer.

(Refren)

1. Konman pep Zeova, al proklanm partou
Sa nouvel lo Rwayonm ek tou son byenfe,
Ki fodre obei pep Bondye touzour
E pour gard linite ek fidelite.

(REFREN)

*Nou rekonesans ek lobeisans,
Nou dwa nou Kreater,
I donn proteksyon e donn lafeksyon,
Ofer li lanmour senser.*

2. Ya in donn son lesklav ek son lespri sen,
Pour gid nou lo semen, trase par Zezi.
Annou reste fidel pour fer li kontan,
Fer ki tou bann nasyon i ganny averti.

(Refren)

1. Reste fidel ek Zeova,
E kontan li senserman.
Nou anvi konn son lalwa sen,
Konman en pep ki'n dedye.
Si nou pe swiv son bon konsey,
Pou protez nou parfetman.
Touzour fidel, nou krwar dan li.
Dan bor li nou san danze.
2. Reste fidel anver nou frer,
Siport zot dan movetan.
Par ou parol ek ou aksyon,
Demontre zot labonte.
Annou respe nou frer ek ser
E onor zot senserman.
Les son Parol inifye nou
E reste dan zot kote.
3. Reste fidel e swiv gidans
Bann sirveyan ek ansyen.
Nou pou sanze, amelyore,
Dan nou lespri ek leker.
Zeova pou beni nou tou
E ed nou kan nou bezwen.
Kan nou fidel, osi senser,
Nou pou vin pour nou Bondye.

125 “Ere bann ki pran pitye pour lezot!”

(Matye 5:7)

1. Bondye ere i pran pitye,
Pa zis akoz i bezwen fer.
I pran plezir dan sa ki byen
Kontan donner avek gran ker.
Sa bann ki repantir i sir
Ki zot Bondye pou pran pitye,
Ki i konnen nou lapousyer,
Bondye i bon e pran pitye.
2. Ler nou sagren akoz pese
E nou bezwen pardon Bondye,
Zezi in montre nou konman
Priye pour nou ganny pardonnen:
‘Pardonn nou pour nou bann pese,
Parey nou nou pardonn lezot’
E ed nou pour pa gard rankin,
Nou anpe avek leker kler.
3. Rode konman pour ed bann pov,
Fer li avek tou nou leker.
Pa pour nou ganny felisite,
Me akoz nou kontan ede.
Sa Bondye ki vwar tou keksoz,
Pou rekonpans annabondans.
Wi, ere tou ki pran pitye,
Nou ganny apresye par Bondye.

1. Met ou pare pour andire.

Reste ferm e vizilan.

Gard ou kouraz ek ou viger.

Laviktwar i garanti.

Nou obei komannman Zezi.

Tenir ferm anba nou Dirizan.

(REFREN)

Reste vizilan, ferm e solid!

Andire ziska lafen!

2. Reste alert, gard ou sanfrwa

Pare pour ou obei.

Direktiv ki Kris i donnen,

Atraver lesklav fidel

E ansyen, par konsey ek rapel.

Zot ki protez bann mouton Zezi.

(Refren)

3. Reste vizilan e ini,
Pour defann laverite.
Menm bann lennmi i opoze,
Nou pou pres ziska lafen.
Zwenn lavwa, kriye zot ki Temwen.
'Gran zour Zeova pe arive!'

(Refren)

127 Ki kalite dimoun mon devret ete?

(2 Pyer 3:11)

1. Ki kado mon kapab rann pour mon lavi?

Pour dir ou, Zeova, mon Bondye, gran mersi.
Par get dan ou liv, pour egzamin mon leker,
Sa vre dimoun ki mon ete, fer li pli kler.

(PON)

Avek ou mon'n dedye mon lavi antye,
Mon pa pe servi ou aköz mon oblize.
Ek tou mon leker mon'n swazir pour servi,
Les mwan vin enn ki fer ou rezoui.

Ed mwan egzaminen e fer mwan konpran
Ki kalite dimoun ki ou vremen kontan.
Tou sa ki fidel, i fer ou leker rezwir,
Permet mwan pour vin enn ki fer ou gran plezir.

1. Parol Bondye ek son promes
I ed nou andire.
Sa ki ou'n aprann e kontan
I vre, bon e asire.

Reste solid dan lafwa sen,
Gard byen antet zour Souvren.
Tenir for ou fidelite,
Leprev pou rafin ou byen.
2. Pa perdi ou premye lanmour,
Ki kapab arive.
Malgre leprev ki ou gannyen,
Fer tou pour ou andire.

Nenport tes ki ou rankontre,
Pa zanmen per, ni doute.
Zeova pou delivre ou,
Wi, Bondye pou touzour pre.

3. Tou ki andir ziska lafen
Pou sirman ganny sove.
Wi, zot non pou dan liv lavi,
Pou ganny klerman angrave.
Wi, fer landirans vin ou bi,
Les li ogmant ou lafwa.
Ou pou konn faver Zeova,
Ek en kantite lazwa.

1. Konman nou kapab
Andire ziska dernyen zour?
Menm dan son soufrans
Zezi ti vwar promes Bondye.
Son konfyans, son lafwa,
I ti reste zwaye.

(REFREN)

Wi, nou bezwen landirans.

Lafwa, nou pou defann.

Lanmour i rekonfort nou.

Annou touzour kontinyen andire.

2. Letan i pase
Menm si nou sagren e soufer,
Dan nou bann douler,
Nou vwar lavi ki pe vini.
Liberte, pou laba,
Alor nou andire.

(Refren)

3. Nou pa arete

Ni bezwen doute oubyen per.

Nou oule fidel

Ziska Zeova i vini.

Kontinyen andire.

Lafen i vreman pros.

(Refren)

1. Atraver son Garson,
Bondye in fer li posib
Pour nou pese ganny pardonnen
E lanmor ganny aboli.
Si nou repantir senserman,
I pou donn nou son pardon
Lo non sa enn ki'n pey ranson,
Nou bon Sover Zezi Kri.

2. Pour nou ganny pardonnen,
Fodre swiv legzanp Bondye.
Pardonn lezot san gard rankin,
Par montre lanmour senser.
Annou touzour siport lezot,
Fer nou mye pour pa bles zot,
Annan respe pour tou nou frer,
Osi labonte senser.

3. Pitye en kalite
Ki nou bezwen devlope.
I pou anpes nou gard rankin,
Ek laenn pour nou lennmi.
Kan nou swiv legzanp Zeova,
Ki annan pli gran lanmour,
Nou pardonn ek tou nou leker,
Ki fer nou resanble li.

131 “Sa ki Bondye in ini ansanm”

(Matye 19:5, 6)

1. Ek dinyite, lazwa,
En maryaz i ganny fer.
Bondye ek zonm i temwen
Ler sa ve i ganny fer.

(REFREN 1)

*I'n promet devan Bondye
Pour kontan son madanm.
'Sa ki Bondye in ini,
Zonm pa pou separe.'*

2. Zot sers Parol Bondye
Pour konn obei li,
Pour rod son benediksyon,
Zot ve, zot akonpli.

(REFREN 2)

*I'n promet devan Bondye
Pour li kontan son msye.
'Sa ki Bondye in ini,
Zonm pa pou separe.'*

1. Anfen sa i mon prop lezo,
Mon prop laser, mon nepli tousel.
Bondye in donn mwan en konpany,
Enn ki pour mwan tousel.

Nou'n vin en sel, la nou kapab
Kontinyen fer plezir kanmarad.
Konman zonn ek fanm tou le de,
Nou'n vin en sel fanmir.

Nou Bondye nou pou servi touzour.
Ek son direksyon,
Senserman montre lanmour.

Parey nou'n dir, fer li nou ve.
Ki nou a vwar bann moman zwaye.
Ki nou onor Bondye touzour,
E ki nou reste anmoure.

1. Nou bann zenn, nou presye pour Zeova.
Nou kontan donn nou lafors fidelman.
Touzour i pe montre lanmour pour nou,
Tou dilon nou lavi, i beni nou.
2. Nou onor nou paran ki kontan nou
Ed nou dir zot: Nou kontan zot osi.
Nou le fer plezir Bondye ek lezot,
Vin pli pros ek Zeova nou Zanmi.
3. Annou mazin Zeova ler nou zenn
E sak zour, kontan plis laverite.
Donn nou meyer nou Bondye, nou pou fer
Plezir Zeova pour leternite.

134 *Zanfan, en leritaz sorti kot Bondye*

(Psonm 127:3-5)

1. Kan en zonm i vin en papa,
En madanm i donn nesans en zanfan,
Fodre rapel, sa vre leritaz,
Pa zis pour zot, zot de selman.
Se en kado donnen par Bondye,
Sa sel vre sours lanmour pir ek lavi.
Gidans parfe, i donn tou paran.
Avek lasazes, fer li grandi.

(REFREN)

*Zot ganny konfye leritaz sakre.
Kado presye dan zot lanmen.
Fer zot zanfan sa pli gran kado,
Montre li sa sel vre semen.*

2. Tou parol ki Bondye in dir
Dan fon zot leker fodre i grave.
Pour transmet li avek zot zanfan,
Sa i ou rol, pran li serye.
Koz avek zot ler ou pe marse,
Kan ou leve e kan ou al dormi.
Ki zot rapel li tou zot lavi
E reste fidel e ganny beni.

(Refren)

135 *Rapel Zeova: 'Vin saz, mon zanfan'*

(Proverb 27:11)

1. Garson, fiy,
kontan mwan avek tou ou leker.
Satan ki provok mwan
pou bezwen vwar byen kler.
Zot dedye zot zenes
pour mwan volonterman.
Montre lemonn
ki zot viv pour servi zis mwan.

(REFREN)

*Mon bann garson ek fiy byenneme,
Vin saz, fer mon lavolonte.
Servi mwan avek tou zot leker,
Par ou swa montre mwan loner.*

2. Rezwir e pran plezir
servi mwan senserman.
Menm si ou tonbe,
ou pou kapab kont lo mwan.
Menm dimoun i dezapwent ou
e anbet ou,
Pran kouraz, pa zanmen bliye,
mon kontan ou.

(Refren)

136 *En saler parfe sorti kot Zeova*

(Rit 2:12)

1. Zeova, en Bondye fidel i konn byen
 Son serviter ki tou pour li,
 Ki souvan par zot lafwa ek devouman,
 Bokou keksoz zot in perdi.
 Si ou'n kit ou lakour, fanmir ek zanmi,
 Tou i pran an kont par Tre O.
 Ki fer ou rezwir sa vre fraternite
 Ek lavi dan lemonn nouvo.

(REFREN)

*Zeova pou sirman rekonpans ou.
 Bondye pou donn ou en saler parfe.
 Ki ou kasyet anba son lezel,
 Zeova i fidel e senser touzour.*

2. Par ler nou santi ki problem tro bokou,
 Nou nepli kapab siporte,
 Ki zot ekspekte tro bokou avek nou,
 Nou nepli kapab kontinyen.
 Bondye konpasyon i konn tou ou bezwen,
 I pou ekout ou lapriyer.
 Son Parol, son lespri sen ek ou zanmi
 Pou ed ou e rekonfort ou.

(Refren)

1. Madanm parey Sara, Rit, Mari, Ester
Zot ti bann madanm fidel, bon, debrouyer.
Dan zot lavi, Bondye ti touzour premye.
Renonmen parmi tou pour zot lwayote.
Lezot ankor ti byenneme Senyer.
Wi, enkoni petet, me lafwa menm grander.
2. Kouraz, labonte, konpasyon, lwayote,
Bann zoli kalite ki ganny apresye.
Bann bon kalite ki zot fer nou rapel.
Legzanp ekselan e bann zoli model.
Ser Kretyen ki pe mars dan zot lepa,
Gras a zot bon servis, zot merit ganny lazwa.
3. Manman ek zot fiy, madanm, vev ek tou ser,
Ki depans lafors dan servis volonter.
Latitid modes ek en leker soumi.
Aproveuve par Bondye, pa per, ni kanmi.
Wi, ki Bondye i gard zot, ser Kretyen,
Tenir zot lafwa ferm, zot rekonpans pa lwen.

1. Bann aze ki parmi nou,
 Frazil e fletri
 Pe kontinyen andire.
 Graponn vre lavi,
 Menm lafors in diminyen,
 Perdi en konzwen.
 Papa, donn zot plis lafwa
 Dan lavi san fen.

(REFREN)

*O Papa, rapel byen
 Zot fidelite.
 Ki ou fer zot konnen
 Zot ganny aprouve.*

2. Seve blan en labote
 Lo latet bann zis.
 Sa bann fidel i zoli
 Dan lizye Bondye.
 Fodre pa nou oubliye,
 Pandan zot zenn tan,
 Zot lafors, zot ti ofer
 Touzour fidelman.

(Refren)

139 *Mazin ou dan nouvo lemonn* (Revelasyon 21:1-5)

1. Imazin ou, ensi ki mwan,
Nou tou dan nouvo lemonn aprezan.
Ki santiman, ou pou annan,
Pour viv anpe, lib, eternalman.
Sa enn move in ganny tire.
Lalwa Bondye, personn pa kase.
Sa nouvo konmansman pour later nou vwar.
Avek en kantik loner
nou pe rann li glwar:

(REFREN)

*“Zeova, mersi, ou’n fer tou ki bon.
Tou i nef, atraver renny ou Garson.
Nou leker i deborde avek bann sanson.
Louanz, laglwar, loner i al pour ou gran non.”*

2. Zis mazin ou e mwan osi,
Dan nouvo lemond pe get lavenir.
Sa ki nou vwar e pe tande,
Pa fer nou per, ni fer nou tranble.
Tou in vin vre, in akonpli.
Tou limanite in ganny beni
E la aprezan i lev tou bann ki'n mor
E zot zwenn avek nou
pour loue li pli for:

(Refren)

1. Esey vwar dan ou lespri,
Tou dimoun pe viv ansanm.
Dan lape e san soufrans,
Ni douler, ni plere.

(REFREN)

Sant ek tou ou leker!

Ou kapab la osi.

Esper sa zour pour ou dir:

“Lavi san fen, anfen!”

2. Bann aze pou’n revin zenn,
Anpe avek Zeova.
Kot pou napa ni traka,
Ni douler, ni plere.

(Refren)

3. Nou kontan vwar Paradi
E pour sant laglwar Bondye.
Nou pou touzour dir mersi,
Bondye nou Kreater.

(Refren)

1. Tou zanfan ki ne, Tou pti gren lapli,
Tou reyon annor soley, Sak pti zepi,
I kado Bondye, Nou gran Kreater.
Toulezour son bann mirak i donn li loner.

(REFREN)

*Ki nou pou fer avek sa zoli kado?
Apard ki kontan son Loter e apresye li.
Nenport kwa ki nou fer, Pa kapab aste li.
Touzour i en kado, Lavi i en mirak.*

2. Lezot i kite, Pa esey ankor,
Parey madanm Zob ti dir: 'Modi li, mor.'
Nou, nou pa koumsa. Nou pou loue li.
Remersye li pour sak moman dan nou lavi.

(REFREN)

*Ki nou pou fer avek sa zoli kado?
Apard ki kontan kanmarad e apresye zot.
Nenport kwa ki nou fer, Pa kapab aste li.
Touzour i en kado, Lavi i en mirak.*

1. Dimoun in perdi dan fernwanr tou sa letan.
Zot tay anven pour esey atrap divan.
Zot fot grav in ganny manifeste klerman.
Nou'n pri dan nou pese ek tourman.

(REFREN)

Sant for ansanm, Rwayonm Bondye i la!

Renny son Garson in tir nou dan lafreyer.

Byento i pou elimin malfeter.

Lespwar, konman lank, pa pou kit nou ater.

2. "Lafen i pros!" tou bann Temwen pe anonse.
"Kan lafen?" bann zonm pou aret demande.
Byento tou kreasyon pou ganny libere.
Bondye Tou Pwisan pou ganny loue.

(Refren)

143 *Kontinyen veye, travay e espere* (Romen 8:20-25)

1. Bondye letan ek bann lepok,
Zis li ki apel Zeova.
Letan pour sanktifye son non
I pros, son plan akonpli.

(REFREN)

*Annou kontinyen veye e travay,
Avek lazwa, nou espere
Lavi Bondye in promet.*

2. Letan fikse depi lontan
I la pour Zezi Kri Lerwa
Ranport laviktwar lo lennmi
E sov tou limanite.

(Refren)

3. Menm si kreasyon pe plennyen,
Lafwa i ed nou espere.
Zour Zeova pe aprobe
E donn nou laliberte.

(Refren)

1. Kan tou bann aveg i vwar ankor
E tou bann ki sourd i tann ankor,
Ler zanfan i sant leker kontan
Lazwa, lape i la toultan,
Ler i pou nepli annan lanmor,
Tou lager, pese nepli ankor.

(REFREN)

*Zeova pou'n anmenn Paradi.
Fikse ou regar lo sa pri.*

2. Kan lelou i manz ek pti mouton,
Bann lours ek pti bef in vin dalon.
Zot tou pou kapab ganny dirize
Par en pti zanfan san danze.
Ler personn pa pou bezwen plere.
Lafreyer ek douler, oubliye.

(Refren)

145 Promes Bondye pour en paradi

(Lik 23:43)

1. En paradi, en promes Bondye,
Ki Rwayonm Kris pou etabli,
Kan tou pese pou ganny efase.
Lanmor, soufrans, tou pou nepli.

(REFREN)

Later pou vin en paradi.

Nou kapab vwar, par nou lafwa.

Promes ki pou ganny akonplir,

Par Zezi Kri ek Zeova.

2. Later pou vin parey plan Bondye.
Son Garson pou lev bann ki'n mor.
I ti fer sa promes merveye:
'Dan Paradi n'a zwenn ankor.'

(Refren)

3. Sa Paradi, Zezi ti promet.
I pou diriz lo sa later.
Sak zour nou dir, Bondye gran mersi,
Sant son louanz tou nou leker.

(Refren)

146 “Mon pe fer tou keksoz nef”

(Revelasyon 21:1-5)

1. Siny i prouve ki Rwayonm in enstale.
Lo tronn, Garson Bondye pe asize.
Osyel, i'n ganny laviktwar dan lager.
Byento tou pou soumet li lo later.

(REFREN)

*Latant Bondye in enstale.
Parmi imen, i pou reste.
I pou napa ni soufrans, ni lanmor,
Ni sagren, ni leokri, ni plere.
'Tou pou vin nef,' Bondye in deklare.
En promes fidel e vre.*

2. Nouvo Zerizalenm, zonm i admir ou,
Nouvel marye Kris, lalimyer pour tou.
Avek bann pyer presye i'n ganny kouver.
Zis Zeova ki pou son lalimyer.

(Refren)

3. Sa zoli lavil, en mervey pour imen.
Tou son baro pa pou zanmen fermen.
Lo tou nasyon, son laglwar pou briye.
Annou reflekte lalimyer Bondye.

(Refren)

1. Lavi dirab i asire.

Later pa pou ganny detrir.

‘Bann ki drwat’ pou byen prospere.

En promes garanti.

(REFREN)

Nou pou viv pour touzour.

Nou bezwen andire.

Promes Ya i senser.

Son Parol i vre.

2. En paradi parfe pou la,

Imen pou ganny libere.

Anba lord parfe Zeova,

Nou pou trouv vre lape.

(Refren)

3. Tre byento par rezireksyon,

Tristes pa pou egziste.

Lanmour pou en benediksyon,

Larm pou ganny efase.

(Refren)

1. Zeova ou en Bondye vivan e reel,
Ou travay tre pwisan
lo later, dan lesyel.
Napa ki egal ek ou, zot tou zot fo,
wi zot fo,
Zot tou zot pou nepli.

(REFREN)

Zeova i delivre son bann fidel.

Son pep pou trouve i en proteksyon pour zot.

Avek kouraz ek lafwa dan li,

nou anonse,

Ki Zeova i delivre nou,

loue son non.

2. Menm si lanmor i antour mwan, mon pou rod ou.
“Lafors avek kouraz, Bondye,
donn mwan bokou.”
Dan tanp sen kot ou reste, ou ekout mwan,
“Protez mwan,
Delivre mwan, Papa.”

(Refren)

3. Papa, parey loraz,
nou pou tann ou lavwa.
Ou lennmi pou tranble,
ou pep pou dan lazwa.
Ou vin tou sort kalite pour sov ou pep,
tou i vwar,
Ou menm ki pou sov zot.

(Refren)

1. Sant pour Zeova. Son non i vreman ganny glorifye.
 Son lennmi Eziptsyen, l'n noy zot tou dan lanmer.
 Loue Tou Pwisan,
 Napa personn ki egal ek li.
 I apel Zeova,
 Li menm ki pou ganny lager.

(REFREN)

*O Zeova, ou pli o ki tou,
 Depi touzour ou pa'n zanmen sanze.
 Byento ou pou defet tou ou lennmi.
 Ou non sen pou ganny sanktifye.*

2. Zot ki kont Bondye,
 Ekout nou gran Souvren Zeova.
 Zis parey Faraon,
 Zot tou zot pou ganny kraze.
 Zot in ganny marke,
 Pour destriksyon zour Armagedon.
 Byento tou pou konnen, Zeova i non Bondye.

(Refren)

150 *Rod Bondye pour ou delivrans* (Zefanya 2:3)

1. Tou pep i zwenn ansanm
Pour opoz Garson Bondye.
Kan Bondye i pronons son lord,
Zonm pou nepli dirize.
Zot lerwa nepli la,
Rwayonm Bondye pou reste.
Byento Kris pou kraz tou bann lennmi.
Ni enn pa pou egziste.

(REFREN)

*Rod Bondye pour ou delivrans,
Wi, dan li annan konfidans.
Rod son ladrwatir,
Montre ou fidel,
Reste ferm ek son souvrennte
E ganny delivre par Bondye
Par son lanmen for.*

2. Zonm i annan en swa
Ekoute ou refize.
Tou dimoun i bezwen swazir,
Sa ki i pou aksepte.
Bann tes vreman sever,
Zot pa devret fer nou per.
Bondye i kontan son bann fidel.
I pou ed zot nenport ler.

(Refren)

I pou kriy zot (Zob 14:13-15)

1. Parey brouyar ki paret dan en zour,
Ki resanble nou lavi.
Nou tou nou pou ale sakenn son tour,
Avek larm ek leokri.
Si an ka nou mor, i posib pour viv?
Ekout sa promes Bondye:

(REFREN)

Par son lord, Bann mor pou reponn.

I pou redonn zot lavi.

Akoz sa i son dezir

Trouv son promes akonpli.

Ek lafwa, pa bezwen sirprann,

Nou kapab resisite

E nou pou viv pour touzour,

Konman son bann byenneme.

2. Menm si zot mor, zot mon zanmi fidel.
Zot pa pou ganny oubliye.
Tou bann ki'n mor ki dan memwar Bondye,
Dan lanmor zot pou leve.
Zot pou eksperyans en nouvo lavi,
Pour touzour dan Paradi.

(Refren)

Lalis bann kantik dan lord alfabetik:

- Akey lezot 85
Al kazankaz 83
Andire ziska lafen 128
Ankouraz kanmarad 90
Annavan serviter Rwayonm! 69
Annavan Temwen! 61
Annou avanse! 65
'Anonse' 67
Anons laverite Rwayonm 72
Anons mesaz avek tou sort kalite
dimoun 57
Anons sa bon nouvel 66
Ansennyen par Zeova 86
"Ansenny Parol Bondye" 78
Ansenny zot pour ki zot reste ferm 79
Aprann pardonnen 130
Aprezan nou en sel 132
Bann berze, bann zonm konman
kado 103
Bann kalite Zeova 1
Beni nou renyon 93
Beni, si ou ekoute 89
"Bondye i lanmour" 105
Bondye pou revel son bann garson 27
Dedikasyon Kretyen 52
Dedye nou lavi avek Bondye! 51
"Demontre pasyans" 114
Devlop lanmour 106
Donn koudmen 84
Donn nou lardyes 73
"Donn nou plis lafwa" 118
Ed zot sov zot lavi 60
En lakaz an ou non 92
En nouvo kantik 62
En pep ki pour Bondye 25
En saler parfe sorti kot Zeova 136
"Ere bann ki pran pitye pour lezot!" 125
Fer en bon non avek Bondye 39
Fer leker Zeova kontan 49
Fikse ou regar lo sa pri! 144
Fodre annan lafwa 119
'Fodre ed bann feb' 102
Ganny lanmitye Zeova 28
"Goute e vwar konman Zeova i bon" 80
I pou fer ou for 38
I pou kriy zot 151
Imit ladouser Zezi 120
Kantik laviktwar 149
Ki kalite dimoun mon devret ete? 127
Ki mannyer ou santi? 76
Kontan lezot avek tou ou leker 109
Kontinyen rod Rwayonm premye 21
Kontinyen veye, travay e espere 143
Kreasyon i loue Bondye 11
Kris i nou model 13
"La mon la! Anvoy mwan" 75
"La sa semen" 54
Labonte 117
Labote seve blan 138
Lalimyer dan en lemonn fernwanr 77
Lalimyer i vin pli kler 95
Lanmour fidel Bondye 108
Lapresyasyon pour pasyans
Bondye 115
Lapriyer remersiman 43
Lapriyer serviter Bondye 42
Larg ou fardo lo Zeova 33
Lavi en pionye 81
Lavi i en mirak 141
Lavi san fen, anfen! 140
"Lazwa Zeova" 110
Legzanp lanmour Bondye 107
Lespri sen, en kado sorti kot
Bondye 104
Lesyel i deklar laglwar Bondye 6

Liv Bondye, en trezor 96
 Loue Garson Bondye! 15
 Loue nou nouvo lerwa 14
 Loue Ya pour son Garson 16
 Loue Zeova nou Bondye! 10
 Mars avek Bondye 31
 Mars avek fidelite 34
 Mazin ou dan nouvo lemond 139
 Meditasyon mon leker 45
 Mersi Zeova 46
 Milyon frer ek ser 99
 Mon lapriyer dedikasyon 50
 "Mon oule" 17
 Mon Papa, mon Bondye ek Zanmi 30
 "Mon pe fer tou keksoz nef" 146
 Montre mwan ou semen 88
 Nou annan lape 113
 Nou bezwen kontrol nou 121
 Nou dir ou mersi pour sa ranson 18
 Nou lafors, nou lespwar, nou
 konfyans 3
 Nou pou kontinyen andire 129
 Nou travay avek lanmour 91
 Ou'n donn ou Garson presye 20
 Ou'n fer li pour mwan 26
 Pa per zot! 55
 Port ou non avek dinyite 29
 Pour lekel nou pe viv? 40
 Pouvwat labonte 116
 Pran kote avek Zeova! 32
 Pran plezir pour partisip dan rekolt 64
 Prepar nou pour prese 53
 Priy avek limilite 44
 Priy Zeova toulezour 47
 Promes Bondye pour en paradi 145
 Promes lavi eternal 147
 Protez nou leker 36
 Rapel Zeova: 'Vin saz, mon zanfan' 135
 Rekonesan pour Parol Bondye 94
 Repa Senyer 19
 Resevwar zot avek lospitalite 100
 Reste ferm e solid! 122
 Reste vizilan, ferm e solid 126
 Rezon pour nou zwaye 111
 Rod bann ki merit led 70
 Rod Bondye pour ou delivrans 150
 Rod dimoun ki kontan lape 58
 Rwayonm pe dirize! 22
 "Sa ki Bondye in ini ansanm" 131
 Sak zour mars avek Zeova 48
 Sant ansanm sa kantik lo Rwayonm! 74
 Senm lagrenn Rwayonm 68
 Ser Kreyten fidel 137
 Servi Zeova avek tou ou leker 37
 Silvouple ekout mon lapriyer 41
 Soumet avek Zeova 123
 Tenir for nou lespwar 142
 Tou Lekritir i enspire par Bondye 98
 Touzour fidel 124
 Travay ansanm dan linite 101
 Travay merveye Bondye 5
 "Verifye sa ki pli enportan" 35
 Vin kot montanny Zeova 24
 Vin loue Ya 59
 Vini! Ganny rafresi 87
 Viv laverite 56
 Viv lo Parol Bondye 97
 Wi, nou larme Zeova! 71
 Wi, nou Temwen Zeova! 63
 Zanfan, en leritaz sorti kot Bondye 134
 Zenn, annou ador Zeova 133
 Zeova, Bondye lape 112
 Zeova, Bondye Tre O 12
 Zeova i delivre 148
 "Zeova i mon berze" 4
 Zeova i nou Lerwa 9
 Zeova i nou refiz 8
 Zeova i ou non 2
 Zeova i pran pouvwat 23
 Zeova, nou lafors 7
 "Zot lalimyer i devret briye" 82

